

# फोरबु जाया मानसिफोरखौ ओन



**WBTC India**

P.O. 8478

Bangalore 560084

# **The God Who Loved the People (Bodo Gospel of Mark)**

*Easy-to-Read Version*

Copyright © 2018 World Bible Translation Center-India

*All rights reserved*

Address

**WBTC-India**

18-19, 6th Street, 1st Block, Prakruthi Township

Babusapalya, Bangalore 560 043

Phone: 25603212, 25603461

Email: [info@wbtcindia.com](mailto:info@wbtcindia.com)

Website: [www.wbtcindia.com](http://www.wbtcindia.com)

Typeset By WBTC-India

*Printed at Printpulz Enterprises, Sri Lanka*

## मारकुस

जहनआ जिसुनि थाखै लामा थाम-थिम खालामनाय

**1** 'ईशोरनि बिसाज्ला जिसु ख्रिष्ट'नि गाहाम रादाबा जागायजेननाया <sup>2</sup>बेनो दि, जिसया नाबिनि बुंनाय आरो जाफुंनाय। बियो लिरदों:

“खोनासं! आंडो नोंनि सिगां थान्दै थोनहरगोन बियो  
नोंनि लागै लामा थाम-थिम खालामगोन।”

मालाखि 3:1

<sup>3</sup> “मारु गोरान फोथार बारिआव सासे मानसिआ गाबज्जि बायदों:

‘फोरबुनि थाखै लामा थाम थिम खालामदो।  
बिनि थाखै लामाखौ थोंजों खालामदो।’ ”

जिसया 40:3

<sup>4</sup>जहनआ मानसिफोरखौ मारु गोरान फोथार बारिआव बाप्टिस्मा होयै होयै फैबाय थार्दोमोन। बियो मानसिफोरखौ बाप्टिस्मा लानो थिनदोंमोन जाहाथे बिसोरो गावनि गोसोनि सोलायनायखौ दिस्थिनो हायो आरो बिसोरनि फाप फोरा निमाहा होजायो। <sup>5</sup>गासै मानसिफ्रा जुदा हादार आरो जेरुसालेम नोगोरनिफ्राइ जहननि खाथियाव फैबाय। बिसोरो गावनि गाज्जि मावनाय फोरखौ सिमान लाबाय आरो बियो बिसोरखौ जरदन दैमायाव बाप्टिस्मा होबाय।

<sup>6</sup>जहना उटनि खोमोनजों बानायनाय गस्ला आरो जानजिआव बिगुरनि बेल खायोमोन। बियो गुमा गयं आरो हाग्रानि बेरे मोदै जायोमोन।

<sup>7</sup>जहना मानसि फोरखौ बेबायदि बुंदों “जाया आंनि उनाव फैगोन बियो आंनि खुइ बांसिन मावनो हाग्रा। आंडो बिनि फैथाखौबो गंनानै खेवनो समायै बान्दा बादि। <sup>8</sup>आं नोंसोरखौ दैजों बाप्टिस्मा होदों, नाथाइ जाया फैगौ बियो नोंसोरखौ गोथार जिउजों बाप्टिस्मा होगोन।”

### जिसुआ जहनजों बाप्टिस्मा होजानाय

9बै समाव जिसुआ गालिलनि नाजारेथ नोगोरनिफ्राइ जहननि सिम फैदों। जहना जरदन दैमायाव जिसुखौ बाप्टिस्मा होदों। 10जेब्ला जिसुआ दैनिक्राइ ओंखारबोयो। बियो नुबाय अखांआ गेवनानै गोथार जिउआ फारेव बायदि बिनियाव फैनाय। 11आरो सोरगोनिफ्राइ बेबायदि राव फैनानै बुंबाय: नों आनि बिसाज्ला, जायखौ आं अनो। आं नोंजों जोबोर खुसि जायो।

### जिसुआ आनजाद खालाम जानो थानाय

12आरो गोथार जिउआ जिसुखौ मारु गोरान फोथार बारिआव थोनहरबाय। 13बियो बेयाव ब्रैजि सान सैतानजों आनजाद लाजादों। बै समाव बियो हाग्रानि जिब जुनार फोरनि गेजेरावमोन। नाथाइ आरफ'आ फैनानै बिखौ हेफाजाब खालाम फैदों।

### जिसुआ गावनि खामनिखौ गालिलआव जागायजेननाय

14जहना जोबर्थेसालिआव दोनजानायनि उनाव, जिसुआ गालिलआव थानानै मानसिफोरनो ईशोरनि गाहाम रादाबखौ बुंहैदों। 15बियो बुंदों, “दानो मोजां समा। ईशोरनि राइजोआ खाथि जाबाय। नोंसोरो गावनि गोसो आरो जिउखौ सोलायनानै गाहाम रादबखौ फोथायदो।”

### जिसुआ माखासे सेलाफोरखौ सायख'नाय

16जिसुआ गालिल लैथो जिं जिं थाबाय लांदोंमोन। बियो सिमन आरो बिनि फंबाय आन्द्रियासखौ नुदों। बिसोर सानै सुबुंआ ना हमग्रामोन। आरो बिसोरो गावसोरनि जेफोरखौ ना हमनो लैथोआव गारबाय थादोंमोन। 17जिसुआ बिसोरखौ बुंबाय, “आनि उन उन फै आरो आं नोंसोरखौ गुबुन रोखोमनि ना हमग्रा बानायगोन। नोंसोर मानसि हमगोन, ना नडा।” 18बै समाव गोख्रैनो बिसोरो गावसोरनि जे फोरखौ गारनानै जिसुनि उन उन फैबाय।

19जिसुआ गालिल लैथो जिं जिं थाबाय बावबाय। आरो बियो सानै बिदा-फंबायफोरखौ नुबावबाय, जाकुब आरो जहन जेबेदाइनि बिसाज्लाफोर। बिसोरो

गावसोरनि नाव सायाव दंमोन, गावसोरनि जेफोरखौ ना हमनो थाम-थिम खालामदोमोन।  
 20बिसोरनि बिफा जेबेदाइ आरो बिनि मावग्रा मानसि, जाया बिनि बिदा-फंबाय जों  
 नावआव दंमोन। जेब्ला जिसुआ बिदा-फंबायखौ नुयो बियो बिसोरखौ गावजों फैफानो  
 बुंबाय। बिसोरो गावसोरनि बिफाखौ नागारनानै जिसुनि उन उन थांबाय।

### जिसुआ सासे मानसिखौ गाञ्जि जिउनिफ्राइ गहोनाय

21जिसु आरो बिनि सेला फोरा कापारनाहुम आव थांबाय। साब्बादनि दिन खालि  
 जिसुआ खुलुमग्रा न'आव थांबाय आरो मानसिफोरखौ फोरोंबाय। 22बिसोरो बिनि  
 फोरोंनायखौ सोमो नांबाय मानोना बियो बिसोरनि आयेनगुरुफोर फोरोंनाय बायदि  
 फोरोडाखै। बियो सासे एकथियार गोनां बादि सो फोरोंदोमोन। 23जेब्ला जिसुआ  
 खुलुमग्रा न'आव दंमोन, बेयाव सासे मानसिआ गाबखावनानै होनबाय। 24“अ'  
 नाजारेथनि जिसु। नोडो जोंनियाव मा नागिरदों? नोडो जोंखौ फोजोब सानो फैदों  
 नामा?आं मिथिगौ नोडो सोर-नोडो ईशोरनि सासे गोथार।”

25जिसुआ गावनि सोंखारिनाय रावजों बुंबाय, “सिरि था, आरो नों बे मानसिनिफ्राइ  
 ओंखारलां।” 26गाञ्जि जिउआ मानसिखौ सिमब्रेबाय आरो बे जिउआ होञ्जिखावनानै  
 मानसिनिफ्राइ ओंखार लांबाय।

27मानसिफोरा सोमो नांबाय। बिसोरो गावजों गाव सोंजलायबाय, “बेयाव मा  
 जादों?बे मानसिआ माबा मोनसे गोदान फोरोंदों आरो बियो एकथियारजों फोरोंदों।  
 बियो गाञ्जि जिउखौबो बिथोन होदों आरो बिसोरो बिखौ मानिदों।” 28जिसुनि बे  
 मावनाय रादाबा गोखैनो गालिलि हादरनि जेरावबो गोसारबाय।

### जिसुआ गोबां मानसिफोरखौ सोखानाय

29जिसु आरो सेलाफ्रा खुलुमग्रा न'निफ्राइ ओंखारलांबाय। बिसोरो गासैबो जाकुब आरो  
 जहनजों लोगोसे सिमन आरो आन्द्रियासनि न'आव थांबाय। 30सिमननि बिखुनजोआ  
 गोब्राब जब्रा जादोंमोन। बियो लोमजानानै बिसनायाव उन्दुनानै दंमोन। बेयाव थानाय  
 मानसिफोरा जिसुनो बिनि सोमोन्दै बुंदों। 31आरो बियो बिनि बिसिनायाव थांबाय। जिसुआ

बिनि आखायखौ हमनानै गसनो थाखै हेफाजाब खालामबाय। बिनि लोमजानाया थांबाय आरो बियो सोखाजाबाय। अब्ला बियो बिसोरखौ दाव दाव खालामदों।

<sup>32</sup>बे हराव, सान हाबनायनि उनाव, मानसिफोरा गोबां जब्राफोरखौ जिसुनिआव लाबोदों। बिसोरो बादुवा जिउ गोनां मानसिफोरखौबो लाबोदोंमोन। <sup>33</sup>गासैबो नोगोरनि मानसिफोरा दरखंआव जंजाफैदों। <sup>34</sup>जिसुआ गोबां बाइदिसिना बेराम आजार गोनां फोरखौ सोखादों। बियो गोबां बादुवा जिउ फोरखौबो मानसिफोरनिफ्राइ हुवान हरबाय। नाथाइ बियो बादुवा जिउ फोरखौ बुंनो खाबु होआखै मानोना बियो सोर बिखौ बादुवा जिउफोरा मिथिखागौमोन।

### जिसुआ गुबुन नोगोरफोराव थांनाय

<sup>35</sup>न'खा नायै फुंडाव जिसुआ सोरांडा सायावनो सिखानानै न'खौ नागारनानै सिं स्र' जायगायाव हारसिडै आरज खालामनो ओंखारलांबाय। <sup>36</sup>बिनि उनाव सिमन आरो बिनि लोगोफोरा जिसुखौ नागिरनो थांबाय। <sup>37</sup>बिसोरो बिखौ लोगो मोननानै बुंबाय, “साफ्रोमबो नोंखौ नायगिरदों।”

<sup>38</sup>जिसुआ बुंफिनबाय, “जोंडो गुबुन जायगायाव थांनांसिगौ। जोडो बेयावनि सोरगिदिं गुबुन नोगोरफोरावबो थांनागौ आरो आडो ईशोरनि बाश्राखौ बैसोर मानसिफोरनोबो बुंहै नांगौ। बिनि थाखैनो आं फैदों।” <sup>39</sup>बिनिखायनो जिसुआ गालिलनि जेरावबो थांबाय। बियो खुलुमग्रा न'फोराव खोथाबायदों आरो बियो बादुवा जिउफोरखौ मानसिफोरनिफ्राइ हुवान हरदों।

### जिसुआ सासे जब्रा मानसिखौ सोखानाय

<sup>40</sup>खुरिया र'ग गोनां सासे मानसिया जिसुनियाव फैबाय। बे मानसिया हान्थु गुगुबनानै बिखौ खावलायबाय, “नोंहा गोहो दड आंखौ सोखानो नोडो गोसो जायोब्ला।”

<sup>41</sup>अन्नायजों बे मानसिनि थाखै, जिसुनि गोसोआ गाबखांबाय, बिनिखायनो बियो बिखौ दानानै बुंबाय आडो नोंखौ सोखानो गोसो नोडो मोजां जा। <sup>42</sup>हरखाबै बिनि खुरिया र'गआ गोमाबाय, आरो मानसिआ सोखा जाबाय।

43जिसुआ बे मानसिखौ थोनहरबाय। नाथाइ बियो बिखौ गोख्रों बिथोन होदों  
 44“नोंनि थाखै आं मा मावखो बिखौ रावनोबो दाखोनथा नाथाइ थां आरो दौरिफोरा  
 नोंखौ नुथों। आरो ईशोरनो बुलि बावदो मानोना नोडो सोखा जाबाय। मुसिनि बिथोन  
 बादि बुलि बावहैदो। बिनो साफ्रोमनोबो फोरमान होगोन दि नोडो सोखा जाबाय।”  
 45मानसिया ओंखार लांबाय आरो जिसुनि सोखानायखौ साफ्रोमनोबो खोथानानै  
 दिन्थिबाय। आरो जिसुनि बे रादाबा गोसारबाय। आरो बिनिखायनो जिसुआ  
 मानसिफोर नुजासे नोगोरफोराव हाबनो हायै जाबाय, बिनिखायनो बियो सिं स्र’  
 जायगाफोराव थानानै थाहैदोंमोन, अब्लाबो मानसिफोरा गासै नोगोरनिफ्राइ फैनानै  
 जिसु थानाय जायगायाव फैदों।

### जिसुआ स’से गोथै मानसिखौ सोखानाय

**2** 1माखासे साननि उनाव जिसुआ कापारनाहुमाव फैफिनबाय। जिसुआ न’आव  
 फैफिनबाय होननाय रादाबा गोसारबाय। 2बिनि बुंनायखौ खोनासंनो गेदेर हानजा  
 ज’जाबाय। न’आ बुंफबनानै दरजानि बाहेरावबो गसंज्लायनो जायगा थोआखैसै।  
 जेब्ला जिसुआ फोरोंबाय थादोंमोन। 3माखासे मानसिआ स’से गोथै मानसिखौ बाननानै  
 लाबोदोंमोन। 4नाथाइ बिसोरो बे मानसिखौ जिसुनि खाथिआव लांनो हायाखैसै मानोना  
 न’सिडा मानसिफोरजों बुंफबनायमोन। बिनिखायनो बिसोरो जिसु थानाय न’नि उखुम  
 सायाव थानानै गुंदु खालामहैबाय आरो बिसोरो बि स’से गोथै मानसिखौ बैसांआव  
 फुथुनानै गाहायाव हरख्लाइदों। 5जेब्ला जिसुआ बिसोरनि एसेबां फोथाइनायखौ नुदों  
 बियो स’से गोथै मानसिखौ बुंबाय, “जोहोलाव, नोंनि फाप फोरा निमाहा होजाबाय।”  
 6माखासे आयेन गुरुफोरा बेयाव ज’नानै दंमोन। बिसोरो नुबाय जिसुआ मा मावखो  
 आरो बिसोरो गावसोरनि गोसोआव सानदों। 7“बे मानसिआ मानो बेबादि बुंडो?” बियो  
 ईशोरखौ निन्दियो। रावबो फापखौ निमाहा होनो हाया ईशोरा ल’सो हागौ।

8जिसुआ गोख्रैनो मिथिखाबाय बे आयेन फोरोंगुरुफ्रा मा सानदों। बिनिखायनो बियो  
 बिसोरखौ बुंबाय, “नोंसोरनि गोसोआव मानो बे बायदि सोलु फैदों?” 9-10मानसिनि  
 बिसाज्लाया फापखौ निमाहा होनो हानाय एकथियार बे बुहुमाव दं। नाथाइ आं माब्रै

नोंसोरनो फोरमान होनो? जानो हागौ नोंसोर सानदों आं बे स'से गोथै मानसिखौ बे बायदि बुंनाया गोरलैसिन जागौमोन, “नोंनि फापफोरा निमाहा होजाबाय।” बियो जामारदों होननानै जेबो फोरमान जानाय नडामोन। जुदि आं बे मानसिखौ बुंडोब्ला सिखांदो, नोंनि बिसिनाखौ लानानै थाबाय लांदो। अब्ला थारैनो नोंसोरो नुनो मोनगौमोन बे गोहोआ आंहा दंड ना गैया। अब्ला जिसुआ स'से गोथै मानसिखौ बुंबाय। <sup>11</sup>“आं नोंखौ बुंडो सिखांदो। आरो नोंनि बिसिनाखौ लानानै न'आव थांदो।”

<sup>12</sup>गोखैनो स'से गोथै मानसिया सिखांबाय। बियो गावनि बिसिनाखौ दैखांनानै न'नि ख'थानिफ्राइ ओंखार लांबाय। साफ्रोमबो बिखौ नुनो मोनबाय। बिसोरो सोमो नांबाय आरो ईशोरखौ बाख्नायनानै बिसोरो बुंबाय, “बेनो बयनिखुइबो सोमो नांथावना जाथाइ जायखौ जों नुफेराखै।”

### लेबि(माथाइ) आ जिसुनि सेला जानाय

<sup>13</sup>जिसुआ आरोबाव सागोराव थांफिनबाय, आरो बेयाव गोबां मानसिफोरा बिनि उन उन फैदों। अब्ला जिसुआ बिसोरखौ फोरोंदों। <sup>14</sup>बियो लैथोनि जिंडाव थाबायदोंमोन, आरो बियो आरफासनि बिसाज्ला लेबि मुंनि मानसिखौ नुंदों। लेबिआ गावनि जायगायाव ज'नानै खाजना खांदोंमोन। जिसुआ बिखौ बुंबाय, “आंनि उन उन फै।” अब्लानो लेबिआ सिखांनानै जिसुनि उन उन फैबाय।

<sup>15</sup>बे सान खालि जिसु आरो बिनि सेलाफोरा लेबिनि न'आव ओंखाम जादों। बेयावहाय गोबां खाजना खांग्रा आरो गोबां गाज्जि मुं गोनां मानसिफोराबो बिजों ओंखाम जाफादों। (बेयाव हाय गोबां मानसिफोर दंमोन जायफ्रा जिसुनि उन उन थांफाग्रामोन)। <sup>16</sup>जेब्ला माखासे आयेन फोरोंगुरु जायफ्रा फारिसाइ फोरमोन। बिसोरो जिसुखौ गोबां गाज्जि मानसिफोरजों जाफानाय नुदों, अब्ला बिसोरो सेलाफोरखौ सोंदों, “बियो मानो बिसोर खाजोना खांग्रा आरो फापि फोरजों जाफादों?”

<sup>17</sup>जेब्ला जिसुआ बे बायदि बुंनायखौ खोनायो बियो बिसोरखौ बुंबाय, “जायफ्रा जब्रा जादों बिसोरनोसो दकतरखौ नांगौ। नाथाइ जायफोरनि देहाया मोजां बिसोरनो नाडा। आडों मोजां मानसिफोरखौ हांखाइनो फैयाखै, आं फापि फोरखौसो हांखायनो फैदों।”



### जिसुआ गुबुन धोरोमगुरुफोर बायदि नडा

18जहननि सेला आरो फारिसाइफोरा उदै बासिदों। माखासे मानसिफोर जिसुनिआव फैनानै बेबायदि बुंदों, “जहननि सेलाफ्रा उदै बासिदों नाथाइ नॉनि सेलाफ्रा उदै बासियाखै मानो?”

19जिसुआ बुंफिनबाय, “हाबायाव हौवा गोदाननि लोगोफोरा दुखु जाया जेब्ला बिसोरो बिजों थाफायो। बिसोरो उदै बासिनो हाया जेब्ला हौवा गोदाना बिसोरजों दंबाय थायो। 20नाथाइ बे बायदि मोनसे सम सफैगोन जेब्ला हौवा गोदाना बिसोरनिफ्राइ लांखो जागोन। अब्ला बिसोरो उदै बासिगोन।

21“सोरबाफोर गोजाम गस्तलानि गब्लं नि सायाव थापलां होयोब्ला बिसोरो माब्लाबाबो गोदान सुथारै सिनिफ्राइ हासिनानै होआ। बिसोरो बेबादि खालामोब्ला, गोदान सिआ थरमगोन आरो गस्तलानिफ्राइ जिबोगोन। अब्ला गब्लंआ गुवारसिन सो जागोन। 22बेबायदिनो रावबो गोदान द्राखा बिदैखौ गोजाम बिगुरनि दिंग्रिआव सोआ। बे द्राखा बिदैआ दिंग्रिखौ बेरफु होगोन आरो द्राखा बिदैआ बिगुरनि दिंग्रिजों सिलिंखार जाफागोन। नॉसोर सानफ्रोमबो गोदान द्राखा बिदैखौ गोदान बिगुरनि दिंग्रिआवसो सोयो।

### जिसुआ साब्बादनि साननिखुइ देरसिन

23साब्बादनि सानाव जिसु आरो बनि सेलाफोरा माखासे आबादारिनि गेजेर गेजेर थाबाय लांदोंमोन। सेलाफोरा माखासे गमनि बिदां फोरखौ जानो थाखै खालां दोंमोन। 24माखासे फारिसाइफ्रा जिसुखौ बुंबाय, “नॉनि सेलाफोरा मानो बे बायदि खालामदों?साब्बादनि दिनआव गम बिदांखौ खानाया आयेननि बेरेखा।”

25जिसुआ फिनबाय, “नॉसोरो फरायाखै खोमा? दाबिदा मा खालामदोंमोन, जेब्ला बि आरो मानसिफोरा उखैनानै आदार नांगौ जादोंमोन।” 26देरसिन दौरि आबियाथारनि समाव दाबिदा ईशोरनि मन्दिराव हाबनानै ईशोरनो बावनाय फिथा फोरखौ जादोंमोन। आरो मुसिनि आयेन बादिब्ला दौरिफोरा ल' बेखौ जानो हायो। दाबिदा माखासे फिथा फोरखौ गुबुन मानसिफोरनोबो होबावदों।

27अब्ला जिसुआ फारिसाइ फोरखौ होनबाय, साब्बादा मानसिफोरखौ सहाय

खालामनोसो बानायनाय जादों। नाथाइ मानसिफोरा साब्बादजों दैदेन जानो नाडा।  
 28बिनिखायनो मानसिनि बिसाज्लाया गासै साननिबो फोरबु आरो साब्बादनिबो।

### साब्बादनि सानाव जिसुआ सासे मानसिखौ सोखानाय

**3** <sup>1</sup>मोनसे गुबुन समाव जिसुआ खुलुमग्रा न'आव थांबाय। बे खुलुमग्रा न'आव सासे आखाय रानजानाय मानसि दडमोन। <sup>2</sup>माखासे जुदायारि मानसिफोरा जिसुखौ दिथा होनानै नायबाय थादोंमोन। बिसोरो नायनो नेबाय थादों जिसुआ साब्बादनि सानाव मानसिखौ सोखागोनना सोखाया होनानै। बिसोरो जिसुखौ माबाफोर गोरान्थि मावथों होनानै नायबाय थादों। जाहाथे बिसोरो जिसुखौ दाय फोनांनो हायो। <sup>3</sup>जिसुआ बे आखाइ रानजानाय मानसिखौ बुंबाय, “बेयाव गसं जाहाथे गासैबो नोंखौ नुनो मोनो।”

<sup>4</sup>अब्ला जिसुआ मानसिफोरखौ सोंबाय “मा बायदि मावनाया मोजां जागोन बे साब्बादनि सानाव मोजां ना गात्रि मावनाया? बबे मोजां जिउखौ बासायनाया ना आद्रि खालामनाया?” मानसिफोरा बिनो जेबो फिननाय होनो हायासै।

<sup>5</sup>जिसुआ मानसिफोरनि थिं नायहरबाय। बियो रागा जोंदो नाथाइ दुखुबो मोनदों। मानोना मानसिफोरा जोबोर गोसो गोरामोन। बियो बे मानसिखौ बुंबाय, “नोंनि आखायखौ फोलावदो।” मानसिआ गावनि आखायखौ फोलावबाय आरो बियो सोखाजाबाय।” <sup>6</sup>अब्ला फारिसाइफ्रा थांबाय आरो हेरदनि मानसिफोरजों लोगोसे जानानै जिसुखौ बुथारनो खायदा खालाम फाबाय।

### गोबांआ जिसुनि उन उन थांनाय

<sup>7</sup>जिसुआ गावनि सेलाफोरजों लोगोसे लैथो जिंआव ओंखार लांबाय। गालिलनिफ्राइ मोनसे गेदेर मानसिफोरनि हानजा जिसुनि उन उन थांफाबाय। <sup>8</sup>आरो गोबां मानसिफ्रा जुदा हादर, जिरुसालेम, इदुमिया, जरदन दैमा बारै, थुर आरो सिदननि सोरगिदि जायगाफोरनिफ्राइ फैदोंमोन। बिसोर मानसिफ्रा जिसुनि गासै मावनायफोरखौ खोनानानै फैदोंमोन।

<sup>9</sup>जिसुआ बेयाव गोबां मानसिफोरखौ नुबाय, बिनिखायनो बियो गावनि सेलाफोरखौ गंसे नाव थामथिम खालामनो थोनबाय। आरो बिसोरो बिनो थाम थिम खालामना

होबाय। बेयाव नावनि गोनांथि जानाया जाबाय जाहाथे मानसिनि हानजाया बिखौ नारज्जाय फैया। <sup>10</sup>बियो गोबांखौ सोखाबाय, बिनिखायनो गोबां जब्रा गोनांफ्रा बिखौ दांनो नारज्जायबायदों। <sup>11</sup>माखासे मानसिफोरनिआव गाञ्जि जिउफोर दंमोन। जेब्ला गाञ्जि जिउफोरा जिसुखौ नुयो, बिसोरो बिनि सिगाडाव हान्थु खरायनानै होञ्जिखावो, “नोंडो ईशोरनि बिसाज्ला !” <sup>12</sup>नाथाइ जिसुआ बे जिउफोरखौ गोख्रोंडै बिथोन होदों रावनोबो खिनथा नांडा बियो सोरमोन।

### जिसुआ गावनि सा जिनै थोनहरजानायफोरखौ सायख'नाय

<sup>13</sup>अब्ला जिसुआ हाजो सायाव थांदों आरो जायफोरा गावजों थांफानो नांगौ बिसोरखौ लिनहरबाय। बिनिखायनो बिसोरो बिजों बैयाव लोगो लाहैदों। <sup>14</sup>अब्ला बियो बि सा-जिनै मानसिफोरखौ सायख' बाय आरो बिसोरखौ थोनहरजानायफोर होननानै मुंखबाय। बिसोर सा-जिनै थोनहरजानाय फोरखौ गावजों लोगोसे थांफानो नांगौ आरो बिसोर मानसिफोरखौ बियो गुबुन जायगा फोराव ईशोरनि रादाबखौ खोन्थाहैनो थोनहरबाय। <sup>15</sup>बियो बे मानसिफोरनो बादुवा जिउखौ होखारनो हानाय गोहोखौ होदोंमोन। <sup>16</sup>जिसुनि सायख'नाय सा-जिनै मानसिफोरनि मुडा बेनो:

सिमन (जिसुआ बिखौ पितर मुं दोन्दों)

<sup>17</sup> जाकुब आरो बिनि फंबाय जहन, जेबेदाइनि बिसाज्ला फोर (जिसुआ बिसोरखौ बनारगेस मुं दोन्दों, जायनि ओथिआ, “खोरोमनायनि बिसाज्ला”)

<sup>18</sup> आन्द्रियास,

फिलिप,

बारथ'लमाय,

माथाइ, थमास,

आलाफाइनि बिसाज्ला जाकुब,

थाददाइ कानाननि सिमन

<sup>19</sup> जदस इसकारियत (जाया जिसुखौ सुथुरनि आखायाव गथाइदोंमोन)।

### जिसुनि गोहोआ ईशोरनिफ्राइ

20अब्ला जिसुआ न'आव थांफिनबाय, नाथाइ आरोबाव गोबां मानसिफोरनि हानजाया बैयाव ज'जाहैबाव बाय। गोबां मानसिफोर ज'जाबाय जिसु आरो बिनि सेलाफ्रा जानोनो सम मोनज्लायाखैसै। 21बिनि न'खरा बेफोर गासैखौबो खोनाबाय। बिनिखायनो बिसोरो बिखौ लायनो थादों। मानोना मानसिफोरा बुंदों जिसुआ फाग्ला जाबाय।

22जिरूसालेमआव थानाय माखासे आयेन गुरुफोरा बुदों, “सैताना बिनियाव दं! बियो बादुवा जिउनि दैदेनगिरिखौ बाहायदों बादुवा जिउखौ मानसिफोरनिफ्राइ होखारनो।

23अब्ला जिसुआ बिसोरखौ लिंहरनानै ज'खालामबाय आरो बिसोरजों माखासे सल' बाथा फोरखौ बाहायनानै रायज्लायाबाय।” “सैताना गावनि असे बादुवा जिउफोरखौ मानसि फोरनिफ्राइ होखारा। 24मोनसे राइजोआ गावजों गाव नांज्लायानानै थानानै थाया।

25आरो रानज्लायानाय न'खराबो थानानै थाया। 26जुदि सैतना गावनि बेरेखा गसंब्ला आरो गावनि मानसिफोरनि जेंडा दावहा नांब्ला बियो थानानै थाया। बेनो सैनाननि जोबनाया।

27सोरबा जुदि गोहो गोरा मानसिनि न'आव हाबनानै खावनो सानोब्ला बिसोरो बे मानसिखौ खाग्रो नांगोन आब्लासो बिसोरो बै न'खरनिफ्राइ खावनो हागोन।

28आं मिथि होनो गोसो जायोदि मानसिया मावनाय गासै फापनिफ्राइ ख'मा मोननो हायो। आरोबाव बिसोरो ईशोरनि सोमोन्दै गाज्रिसिन बुंनायफोरनिफ्राइबो ख'मा मोनगोन। 29नाथाय जायफ्रा गोथार जिउनि बेरेखा बुंगोन बिसोरो माब्लाबाबो ख'मा होजानाय नडा। बिसोरखौ अरायबो फाफि होननानै बुंनाय जागोन।

30जिसुआ बेफोर बाश्राफोरखौ बुंदों मानोना आयेन फोरोंगुरु फोरा बिनियाव गाज्रि जिउ दं होननानै दाय होदोंमोन।

### जिसुनि सेलाफोरानो बिनि थार न'खर

31अब्ला जिसुनि बिमा आरो फंबायफोरा फैबाय। बिसोरो बाहेराव गसंनानै जिसुखौ बाहेराव लिंहरनो थाखै सोरखौबा थोनहरबाय। 32गोबां मानसिफोरा जिसुनि सोरगिदिं ज'दों। बिसोरो बिखौ बुंबाय, “नोंनि बिमा,नोंनि फंबायफोर, आरो नोंनि बिनानावफोरा बाहेरावनो नेबाय थादों।”

<sup>33</sup>जिसुआ सोंबाय, “सोर आनि बिमायालाय?सोर आनि फंबायफोरा लाय?  
<sup>34</sup>अब्ला बियो गावनि सोरगिदिं ज’नाय मानसि फोरनिथिं नायदावनानै बुंबाय, “बिसोर  
 मानसिफ्रानो आनि बिमा आरो फंबायफोरा। <sup>35</sup>आनि थार फंबाय, बिनानाव आरो  
 बिमाफोरा जाबाय जाया ईशोरनि लुबैनाय बायदि मावो।”

### सासे आबादारिनि बेगर फोनायनि सल’

**4** <sup>1</sup>गुबुन मानसे समाव जिसुआ लैथो सेराव फोरोंनो हमबाय। आरो मोनसे गेदेर  
 हानजाया बिनि सोरगिदिं जुथुमबाय। बियो नावआव गाखोबाय जाहाथे बियो  
 ज’नानै लैथोनिफ्राइ फोरोंनो हायो। गासै मानसिफ्रा दै, सेरसिम हागुंआव गसंबाय।  
<sup>2</sup>जिसुआ बिसोरखौ फोरोंनो गोबां सल’फोर बाहायदों। बिनि मोनसे आयदाया बे  
 सल’आव दडं।

<sup>3</sup>“खोनासं!सासे आबादारिआ बेगर फोनो ओंखार लांबाय। <sup>4</sup>जेब्ला बियो बेगर  
 फोदोंमोन। माखासेआ लामायाव गोग्लैबाय। दावफोरा फैनानै बेगरखौ जाजोबबाय।”  
<sup>5</sup>माखासे बेगरा अनथाय गोनां हायाव गोग्लैबाय जेराव थोजासे हा गैयामोन। बिफोरो  
 गोखैनो रज’दों मानोना हाया गोबामोन। <sup>6</sup>नाथाय अब्लाबो सान्दुंजों बिफांफोरा  
 खामलाबदों। बिफांफोरा थैबाय मानोना बिफोरो गोथौ रोदा सुनो मोनाखैमोन।  
<sup>7</sup>माखासे बेगरफ्रा सु गोनां बिफांफोरनि गेजेराव गोग्लैदों। आरो सु गोनां बिफांफ्रा  
 खोबथाबनायखाय बिफोरो फिथाइ थायनो हायाखै। <sup>8</sup>नाथाइ माखासे बेगरफ्रा मोजां  
 हाफोराव गोग्लैदों। बियाव बिफोर बेरनानै देरदों। आरो फिथाय थायदों, माखासेआ  
 थामजि गुन, आरो माखासेआ द’जिगुन आरो माखासेआ जौसे गुन फिथाइफोर थायदों।

<sup>9</sup>अब्ला जिसुआ बुंबाय, जाय मानसिफोरा आंखौ खोनाबाय। खोनसंथों!

### जिसुआ फोरोंनो थाखै मानो सल’फोर बाहायदोंमोन

<sup>10</sup>बिनि उनाव जिसुआ मानसिफोरनिफ्राइ गोजान जाबाय। बिनि सा-जिनै थोनहर  
 जानायफोर आरो गुबुन माखासे सेला फोरा सल’फोरनि सोमोन्दै बिनियाव सोंबाय।

<sup>11</sup>जिसुआ बुंबाय, “नोंसोरल’ ईशोरनि रायजोनि सैथो थाखोमानाय बाश्राखौ

मिथियो। नाथाइ आं बैसोर गुबुन मानसिफोरनो सल'नि गेजेरजों गासैनोबो खिनथायो।  
12आं बेखौनो मावो दि,

बिसोरो नायब्लाबो नायब्लाबो सैथोखौ माब्लाबाबो नुनो मोना;  
बिसोरो खोनासंब्लाबो खोनासंब्लाबो नाथाइ माब्लयाबाबो बुजिया।  
जुदि बिसोरो नुयो आरो बुजियो  
बिसोरो सोलायनानै खमा मोनो हागौ।”

जिसया 6:9-10

### जिसुआ बेगर फोनायनि सल'खौ बुंफोरनाय

13अब्ला जिसुआ गावनि सेलाफोरखौ बुंबाय, “नोंसोरो सल'खौ बुजिबायना? जुदि बुजियाखै नोंसोरो गुबुन सल'खौ मात्रै बुजिनो हागोन? 14आबादारिया जाबाय सासे जाया ईशोरनि फोरोंनायखौ मानसिफोरनो फोरोडो 15माब्लाबा समाव फोरोंनाया लामायाव गोम्लैयो। बेफोरो जैरे माखासे मानसिफोर जायफोरा ईशोरनि फोरोंनायखौ खोनाबाय। बिसोरो बेखौ खोनानाय लोगो लोगोनो सैताना फैनानै बिसोरनियाव फोनाय बाश्राखौ लानानै थाडो।

16“गुबुन मानसिफ्रा जैरे, अन्थाय गोनां हायाव फोनाय बेगर बादि। बिसोरो फोरोंनायखौ खोनाबाय आरो बिसोरो गोजोननायखौ गोख्रैनो नाजावबाय। 17नाथाइ बिसोरो बिखौ गोथौथै गावसोरनि जिउआव दोनासै। बिसोरो बिखौ दसे समनि थाखैल' दोनबाय। बै फोरोंनाय फोरखौ नाजावनायनि थाखै बिसोरनिआव जेंना आरो सैसोनाया फैनाय लोगो लोगोनो बिसोरो नागार लाडो।

18“गुबुनफोरा जैरे सु गोनां हाग्राणि गेजेराव फोजानाय बेगर बायदि। बिसोरो फोरोंनायखौ खोनाबाय। 19नाथाइ बिसोरनि जिउआ गोबां मुवाफोरजों बेखन जानाय: जैरे-गावनि जिउनि सोमोन्दै साननाय, रांखौ अननाय आरो बिसोरनि गासै लुबैनायफोरजों। बैफोरो फोरोंनायखौ जौगानो होआ, आरो बिफोरनो बिसोरनि जिउआव जेबो फिथाय थायहोआ।

20“आरो गुबुनफोरा जैरे मोजां हायाव फोजानाय बेगर बायदि बिसोरो फोरोंनायखौ खोनासंबाय आरो नाजावबाय बिसोरो देरबाय आरो मोजां फिथाय थायबाय माब्लाबा थामजिगुन, माब्लाबा द'जिगुन बारा आरो माब्लाबा जौसे गुन बारा फिथाय होबाय।

### नोंनि बुजिनो हानायखौ बाहाय

21अब्ला जिसुआ बिसोरखौ होन्दो, “नोंसोरो बाथि खौ सावनानै दन एबा बैसां सिंडाव दोनो ना? थारैनो दोना। बिखौ नोंसोर गासानि सायावसो दोनो। 22गासैबो दोनखोमानायफोरखौ दिन्थिजोबगोन। गासै थाखोमानायफोरखौ मिथि होजोब गोन। 23जाय मानसिफोरा आंखौ खोनाबाय। खोनसंथों! 24जि फोरखौ नोंसोर खोनादों बेफोरखौ गोथौयै सान। ईशोरा मिथिगौ नोंनो बेसेबां होनांगौ नों जेसेबां बुजिनो हायो। नाथाय बियो नों मोन्नांगौनि बांसिन होयो। 25जाय मानसिफोरहा इसे बुजिनाय दं बिसोर बांसिन मोनगोन। नाथाइ जायफोरहा इसेबो गैया बिनिफ्राइ थानाय इसेखौबो लांनाय जागोन।”

### जिसुआ बेगरनि सल'खौ बाहायनाय

26अब्ला जिसुआ बुंबाय, “ईशोरनि रायजोआ सासे मानसिआ हायाव फोनाय बेगर बादिसो। 27बेगरा रजनानै देरो। बियो सान हर देरबाय थायो। मानसिनि उन्दुनाय आरो सिखारनायजों जेबो सोमोन्दो गैया, फिथाया अरायाबो देरो। बियो मात्रै जायो बिखौ बियो मिथिया। 28हाया रावनिबो हेफाजाब गैया लासिनो फिथाइ थायहोयो। गिबियावनो बिफां रज'यो उनाव खर'जायो आरो खर'आ गोबां बेगर जायो। 29जेब्ला बेगारा गोरा जायो, अब्ला मानसिया बिखौ बुथुमो। बेनो जाबाय आबाद बुथुमनायनि सम।”

### ईशोरनि रायजोआ मा बायदि?

30अब्ला जिसुआ बुंबाय, “आं नोंसोरनो माबोरै दिन्थिनो ईशोरनि रायजोआ माबायदि?मा सल'खौ बाहायनानै आं बेखौ बुंफुरनानै फोरमायनो? 31ईशोरनि रायजोआ बेसर बेगर बादि, जाया बयनिखुइबो फिसासिन बेगर बे बहुमाव जायखौ नों फोनो हायो। 32नाथाइ नों जेब्ला बेखौ फोगोन, बियो रज'नानै देरगोन आरो बयनिखुइबो गेदेरसिन बिफांफोर जानानै नोंनि बागानाव थागोन। बियो गेदेर दालायफोर जागोन। हाग्रानि दावसेनफ्रा फैनानै बासा बोयो आरो सान्दुनिफ्राइ रैखा मोनो।”

33जिसुआ बेबादि गोबां सल'फोरखौ बाहायदों मानसिफोरखौ फोरोंनो थाखै। बियो गोबां फोरोंबाय जायजों बिसोर बुजिनो हागोन। 34बियो अराय बो बिसोरखौ सल'जों

फोरोदोमोन। नाथाइ जेब्ला बियो हारसिं गावनि सेला फोरजो थायो, जिसुआ बेफोर गासैखौबो बिसोरनो बुंफोरनानै होयो मोन।

### जिसुनि गोहोखौ सेलाफोरा नुनाय।

35बै सानखालि बेलासेआव जिसुआ गावनि सेलाफोरखौ होनबाय, “आंजो लोगोसे लैथो बारै फै।” 36अब्ला बिसोरो गासै हानजाफोरखौ नागारनानै जिसु गाखोनानै थानाय नावआव गाखो हैबाय। बेयावहाय थानाय गुबुन नाव फोराबो बिसोरजो थांफाबाय। 37लैथोआव जोबोर गाज्जि बार हुंखा फैबाय। लैथोनि दोहौफोरा नावनि सायाव फैनो हमदो आरो दैआ नावआव बुंफबनो हमबाय। 38जिसुआ नावनि सिंडाव गान्दु लानानै उन्दुनानै दंमोन। सेलाफोरा थानानै बिखौ फोजाहैबाय। बिसोरो बुंबाय, “फोरोगुरु नो जोंखौ अना ने? जोडो दैआव दोबै लांसिगोन!”

39जिसुआ सिखांनानै बार आरो दैखौ बिथोन होनानै बुंबाय, “दलद था!” अब्ला बारहुंखाया थाबथाबाय आरो लैथोआ सिरि जाबाय।

40बियो गावनि सेलाफोरखौ बुंबाय, “नोंसोर मानो गिदो? दासिमबो नोंसोरहा फोथायनाय गैया ना?”

41बिसोरो जोबोद गिदो आरो गावजो गाव सोंज्लायदो, “माबादि मानसि बियो?जायखौ बारहुंखा आरो दैयाबो मानियो।”

### जिसुआ सासे मानसिनिफ्राइ गाज्जि जिउखौ होखारनाय

**5** 1जिसु आरो बिनि सोलाफोरा लैथो बारै गेरासिनारिफोर थाग्रा जायगायाव थांबाय। 2जिसुआ जेब्ला नावनिफ्राइ ओंखारो, सासे मानसिआ गोथै सालिनिफ्राइ ओंखार बोबाय, बे मानसिनिआव गाज्जि जिउ दंमोन। 3बियो गोथै सालिआव थायोमोन। रावबो बिखौ जिनज्जिजोबो खानानै दोननो हायामोन। 4गोबां समाव मानसिफ्रा बिखौ जिनज्जिजो आर्थे, आखाइ खानानै दोन्दो, नाथाइ बियो जिनज्जिखौ बस'योमोन। रावहाबो बिखौ दबथायनो हानाय गोहो गैयामोन। 5सान हर बियो होज्जिखावनानै गावखौ अन्थायफोरजो हानानै लानायमोन।



७जेब्ला जिसुआ इसे गोजानाव दंमोन, बे मानसिआ बिखौ नुहुरबाय। बियो जिसुनि खाथिआव खारलांबाय आरो गुग्रुबनानै खुलुमबाय। 7-8अब्ला जिसुआ बुंदों, “नों गाञ्जि जिउ, बे मानसिनिफ्राइ ओंखारबो!” मानसिआ गोबारै हञ्जिखावबाय, “नोडो आंखौ मा नांजादों?जिसु बोलोग्रासिनथार ईशोरनि बिसाज्ला? आडो ईशोरनि मुडै खावलायो, आंखौ साजाय दाहोथार!

९अब्ला जिसुआ मानसिखौ सोंबाय, “नोंनि मुडा मा?”

मानसिया बुंफिनदों, “आंनि मुडा लिजियन, मानोना आंनिआव गोबां जिउफोर दड।” 10मानसिनिआव थानाय जिउफोरा खनले खनले जिसुखौ खावलाय बाय, बे जायगानिफ्राइ थोनहरनो नाडा होनना। 11मोनसे गेदेर फालोनि अमाफोर बे जायगानि होजो सेराव उरजादों मोन। 12गाञ्जि जिउफोरा जिसुनियाव खावलायबाय। जोंखौ बै अमाफोरनियाव थानो होदो। जोडो बिफोरनियाव हाबनानै थाहैगोन। 13अब्ला जिसुआ बिसोरखौ थानो होबाय, गाञ्जि जिउफोरा मानसिखौ नागारनानै अमाफोरनियाव हाबहैबाय। अब्ला अमानि फालोआ हाब्रानिफ्राइ लैथोआव खारलांबाय। आरो लैथोआव बारसोमनानै गब' हैबाय। बे फालोआव गासै हाजारनैसो अमाफोर दंमोन।

14अमा गुमग्रा मानसिफोरा खारलानानै, सोहोराव आरो अमा दोनग्रा फोराव थानानै गासैनोबो खोन्थाहैबाय, बैयाव मा जादोंमोन। मानसिफोरा नायनो खारलांबाय। 15बिसोरो जिसुनियाव फैनानै बिसोरो बे गाञ्जि जिउफोर गोनं मानसिखौ नुबाय बियो थ'त गोनं जानानै सिफोर गाननानै गाहायाव ज'दों। जेब्ला बिसोरो बिखौ नुयो अब्ला बिसोरो गिदों। 16जिसुनि बे मावनायखौ जायफ्रा नुबाय, गाञ्जि जिउ गोनं मानसिहा मा जाखो आरो अमाफोरहा मा जाखो बेफोरखौ बुंबाय। 17अब्ला मानसिफ्रा जिसुखौ बे जायगायावनो थानो खावलायदों।

18जेब्ला जिसुआ नावआव थानो थाम-थिम खालामदोंमोन। अब्ला गाञ्जि जिउफोरनिफ्राइ सख' जानाय मानसिया जिसुजों थांफानो खावलायदों। 19नाथाइ जिसुआ बि मानसिखौ थांफानो होआखैसै। बियो बुंबाय, “न'आव थां, नोंनि न'खर आरो लोगोफोरनियाव खिन्था हैदो फोरबुआ नोंनि थाखै मावनाय गासैखौबो। बिसोरनो खिन्था फोरबुआ नोंनि थाखै बेसे मोजां।

20अब्ला मानसिया थांबाय आरो जि नोगोरफोरनि मानसिफोरनो गावनि थाखै गेदेर मावनाय फोरखौ खिन्था हैबाय। साफ्रोमबो सोमो नांबाय।”

### जिसुआ गोथै हिनजावसानो जिउ होनाय आरो

#### सासे बेरामि हिनजावखौ सोखानाय

21जिसुआ लैथोनि गुबुन बाहागोथिं नावजों थांफिनबाय। बै लैथोनि जिंआव गेदेर मानसिनि हानजाया बिनि सोरगिदिं ज'जाफैदों। 22खुलुमग्रा न'नि सासे दैदेनगिरिया फैबाय। बिनि मुडा जाइरास बियो जिसुखौ नुबाय आरो बिनि सिगांडाव बियो गुगुबनानै खुलुमबाय। 23बियो जिसुखौ ग'ले ग'ले खावलायबाय, “आंनि उन्दै फिसाजोआ थैसिगोन। अननानै फैदो आरो नॉनि आखायखौ बिनि सायाव दोनदो। अब्ला बियो सोखाजागोन आरो थांनानै थागोन।”

24अब्ला जिसुआ जाइरासजों लोगोसे थांबाय। गोबां मानसिफोरा जिसुनि उन उन थांफादों। बिनि खाथिथाराव सोरगिदिं नारसेबज्लादों।

25बेयाव हाय गोबां मानसिफोरनि गेजेराव सासे हिनजाव दंमोन जायहा जिनै बोसोर थै खुरन्नाय बेराम जाजादोंमोन। 26बियो जोबोर सैनादोंमोन। गोबां दाक्टरफोरा बिखौ फाहामनो नाजादोंमोन, आरो बियो गावनियाव थानाय गासै रांफोरखौ बाहाय जोबबाय, नाथाइ बियो हामनो हायाखै। थारैनो बिनि बेरामा बारानिफ्राइ बारा गाज्रिसिनसो जानो हमदों।

27हिनजावआ जिसुनि सोमोन्दै खोनाबाय, अब्ला बियो गुबुन मानसिफोरजों लोगोसे जिसुनि उन उन थांनानै बिनि गस्लाखौ दांहैबाय। 28बियो सानदों जुदि आं बिनि गस्तानि रुबैखौ दांनो मोनोब्लानो आं सोखाजाथारगोन। 29जेब्ला बियो बिनि गस्लाखौ दांबाय, गावनि गासै मोदोमा सैसो नायनिफ्राइ सोखा जाबाय। 30जिसुआ गोखैनो मोनदांबाय गावनि गोहोआ ग'लांबाय होनानां, अब्ला बियो थाथ'बाय आरो उनथिं गिदिंबाय। “आंनि जिखौ सोर दांखो?” बियो सोंबाय,

31सेलाफ्रा जिसुखौ बुंबाय, “बेयावहाय गोबां मानसि नॉनि फारसे नारज्जलायदों। नाथाइ नों सोंदों आंखौ सोर दांखो?”

32नाथाइ जिसुआ बै गावखौ दांग्रा मानसिखौ नागिरबाय थादों। 33हिनजावआ

मिथिबाय गावनोखा होननानै, बिनिखायनो बियो फैनानै जिसुनि आथिं गुदियाव खुलुमबाय। बियो गिनायजों मावग्लुदोंमोन। <sup>34</sup>बियो बिखौ बुंबाय, “अनजाथाव हिनजाव नोडो सोखाजाबाय मानोना नोडो फोथायबाय। गोजोनै थांदो। नों आरोबाव माब्लाबाबो सैसोनो नांबावलिया।

<sup>35</sup>जेब्ला जिसआ बेयाव रायज्यलायबाय थादोंमोन, सोरबा सासे, जाइरासनि न'निफ्राय खुलुमग्रा ननि दैदेनगिरिया फैनानै बुंफैबाय, “नोंनि फिसाजोआ थैबाय फोरोंगुरुखौ दुखु होनांगौ गैलिया।”

<sup>36</sup>नाथाइ जिसुआ बे मानसिनि बुंनायखौ गोसो होआखैसै बियो खुलुमग्रा न'नि दैदेनगिरिखौ बुंबाय, “गिनो नाडा, फोथाय ल।”

<sup>37</sup>जिसुआ पितर, जाकुब आरो जहन जाकुबनि बिदाखौल' गावजों थांफानो होबाय। <sup>38</sup>बिसोरो खुलुमग्रा न'नि दैदेनगिरिनि न'आव थांबाय, बेयाव जिसुआ नुहैबाय गोबां मानसिफ्रा गोबारै गाबबाय थादों। बेयाव हाय गोबां गोनो गोथो जादों। <sup>39</sup>बियो न'सिंडाव हाबनानै बुंबाय, नोंसोर मानो गाबनानै दावराव खालामदों?बे गथ'आ थैयाखै। बियो उन्दुलादोंसो।” <sup>40</sup>नाथाय गोबांडा बिखौ मिनिदों।

जिसुआ मानसिफोरखौ न'खौ नागारनानै थांनो बुंबाय। अब्ला बियो न'नि सिंनि ख'थायाव हाबलांबाय जेराव गथ'आ दंमोन। बियो गथ'नि बिफा आरो बिमा आरो गावनि साथाम सेला फोरखौ न'नि सिंडाव गावजों लांफाबाय। <sup>41</sup>अब्ला जिसुआ हिनजावसानि आखायखौ हमनानै बुंबाय, “टालिथा कौम”(बिनि ओथिया जाबाय, अ' उन्दै हिनजावसा, आडो नोंखौ बुडो सिखां) <sup>42</sup>हिनजावसाया गोखैनो सिखांबाय आरो थाबायनो हमबाय। (बियो जिने बोसोर बैसोनिमोन) बिमा, बिफा आरो सेलाफोरा सोमो नांदो। <sup>43</sup>जिसुआ बिमा, बिफानो होनानै गोख्रोंडै बुंबाय बेफोरखौ मानसिफोरनो खिन्थानो नाडा। अब्ला बियो बिसोरखौ बुंबाय हिनजासानो इसे जानाय मुवाफोर होनो।

### जिसुआ गावनि न'नि नोगोराव थांनाय

**6** <sup>1</sup>जिसुआ नागारनानै गावनि न'नि नोगोराव थांफिनबाय। बिनि सेलाफोरबो बिजों थांफादों। <sup>2</sup>साब्बादनि सानाव जिसुआ खुलुमग्रा न'आव फोरोंबाय आरो गोबां

मानसिफ्रा बिखौ खोनासंदों। बिसोरो सोमो नांदों आरो बुंदों, “बे मानसिआ ब’हानिफ्राइ बेफोर फोरोंनायखौ मोनदों? ब’हानिफ्राइ बेफोर गियानखौ मोनदों? सोर बिनो बिखौ होखो? आरो ब’हानिफ्राइ बियो सोमो नांथावना हाबाफोरखौ मावनो गोहो मोनखो? <sup>3</sup>जायखौ जों साधारन मिसत्रि होनना मिथियो मरियमनि बिसाज्ला, जाकुबनि बिदा, जसेस, जुदास आरो सिमन? आरो बनि बिनानाव जाया दासिमबो बे नोगोराव थायो, बनिखायनो बिसोरहा बिखौ नाजावनायनि जेंना दंमोन।

<sup>4</sup>अब्ला जिसुआ बिसोरखौ बुंबाय, “मानसिफोरा जेरावबो नाबिखौ मान होयो, गावनि नोगोरनि अनगायै। <sup>5</sup>जिसुआ बेयाव जेबो सोमो नांथाव हाबाफोर मावनो हायाखै माखासे जब्रा गोनां मानसिफोरखौ आखाय होनानै सोखानायनि अनगायै। <sup>6</sup>बियो सोमो नांदों बेयावनि मानसिफोरहा फोथाइनाय गैया। अब्ला बियो गुबुन मोनसे गामिफोरनि जायगाफोराव थांनानै फोरोंदोंमोन।”

### जिसुआ गावनि थोनहरजाइफोरखौ दैथाय हरनाय

<sup>7</sup>जिसुआ गावनि सा जिने थोनहरजानायफोरखौ खौसेयै लिंहरबाय। बियो बिसोरखौ सानै सानै हानजा खालमनानै गाज्जि जिउनि सायाव गोहो होनानै थोनहरबाय। <sup>8</sup>बियो बिसोरखौ बेबादि बुंबाय: “नोंसोरो गावजों जेबो लांफानो नाडा थाबायनाय लावथिनि अनगायै। जाग्रा फिथा, जलंगा आरो रां जेबो लांफानो नाडा।” <sup>9</sup>नोंसोर सेनदेल(फैथा) गाननो हागोन नाथाइ गुबुन जिफोर लांदेरनो नाडा। <sup>10</sup>जेब्ला नोसोर न’आव हाबगोन बै न’आव थाबाय था जेब्लासिम नोंसोर बे नोगोरखौ नागारा। <sup>11</sup>जुदि बबेबा नोगोरा नोंसोरखौ नाजावाखै एबा नोंसोरखौ खोनासंनो नेउसियो अब्ला बै नोगोरखौ नागारनानै थां आरो नोंनि आर्थेनि आफाखिखौ फिस्रिनानै गारबो जेन बिसोरो साग्रां जायो।

<sup>12</sup>थोनहरजानायफ्रा ओंखारलांबाय आरो गुबुन गुबुन जायगाफोराव थांबाय। बिसोरो मानसिफोरजों रायज्जायनानै बिसोरखौ बुंबाय, गावनि गोसो आरो जिउफोरखौ सोलायदो। <sup>13</sup>बिसोरो गोबां बादुवा जिउफोरखौ मानसिफोरनिफ्राइ होखारदों आरो अलिब थाव फुननानै गोबां बेरामि फोरखौ सोखादों।

### हेरदआ सान्दों जिसुआ जहन बाप्टिसमा होनानै

<sup>14</sup>हेरद<sup>1</sup> राजाया जिसुनि सोमोन्दै खोनाबाय थांदों मानोना जिसुआ गोबां मुंदांखा जाबाय। माखासे मानसिया बुंदों, “बियो जहन बाप्टिसमा। जानांगौ बियो थैना नै सिंखां फिनबाय आरो बिनिखायनो बेफोर बायदि सोमो नांथाव हाबाफोरखौ मावनो हादों।”

<sup>15</sup>गुबुन मानसिफोरा बुंदों, “बियो एलिजा।<sup>2</sup>” आरो गुबुनफोरा बुंदो, “बियो सासे नाबि।” बियो नाबि बादि, जाया गोबां बोसोर फोरनि सिंगा दंड’मोन।

<sup>16</sup>हेरदा जिसुनि सोमोन्दै बुंनाय बेफोर गासैखौबो खोनादों। बियो बुंबाय, “आं जहनखौ बुथारबाय बिनि खर’खौ दानस’नानै। दायो बियो थैनाय निफ्राइ सिंखांफिनबाय।”

### मात्रै जहन बाप्टिसमाया बुथारजानाय

<sup>17</sup>हेरदआ गावनो बिथोन होदोंमोन, गावनि सान्त्रिफोरखौ जहनखौ हमनानै जोबथेसालिआव दोननो। गावनि हिनजाव हेरदियासखौ गोजोन होनो हेरदआ बेखौ मावदोंमोन। हेरदियासआ हेरद राजानि फंबाय फिलिपजों हाबा जाखाबायमोन, नाथाइ हेरदआ बिखौ हाबा खालामफिनबाय। <sup>18</sup>जहनआ हेरदखौ बुंदोंमोन, “नोडो नोंनि फंबायनि हिनजावखौ हाबा खालामनाया मोजां जायाखै।” <sup>19</sup>बिनिखायनो हेरदियासआ जहनखौ नायनो बायोमोन बियो बिखौ थैजानो लुबैदोंमोन, नाथाइ बियो जहनखौ बुथार होनो हेरदखौ थिननो हायाखैमोन। <sup>20</sup>हेरदआ जहनखौ बुथारनो गिदोंमोन, मानोना बियो मिथिगौ दि जहनआ सासे मोजां आरो गोथार मानसि होननानै। बिनिखायनो बियो बिखौ बासायदोंमोन। बियो जहनखौ खोनासंनो मोजां मोनोब्लाबो, जहननि बुंनायफोराव बिनि थाखै गोबां सोंथिफोर दं।

<sup>21</sup>अब्ला हेरदियासआ थि सम मोनबाय जहनखौ बुथार होनो थाखै। हेरदनि जोनोम सानाव। हेरदा मोनसे गेदेर हरनि भ’ज खालामबाय गावनि गोनां हादरनि दैदेनगिरिफोर,

<sup>1</sup>6:14 हेरद हेरद आन्तिपास देरसिन बिसाज्ला तेत्रारस, गालिल आरो पारसियानि दैदेनगिरि।

<sup>2</sup>6:15 एलिजा सासे जोबोर गोनां इस्रायेलनि दैदेनगिरि आरो नाबि जाया नैजिबा बोसोर 850 BC समसिम ईशोरनि जानानै बुंबाय। जिसुनि समाव जुदायारिफोरा मसिह’नि सिगां फैफिननगोन होनना आसा खालामदोंमोन।

गावनि सान्त्रि गाहायफोर आरो गालिलनि मानगोनां सुबुंफोरखौ लानानै।<sup>22</sup>हेरदियासनि फिसाजोआ बे भ'जआव फैबाय आरो मोसाबाय। जेब्ला बियो मोसायो हेरद आरो बिजों थाफानाय मानसिफोरा जोबोर गोजोनबाय।

अब्ला हेरद राजाया हिनजावसाखौ बुंबाय, “आंडो नोंनो जेखौनो नांगौ बेखौनो होगोन।”<sup>23</sup>बियो बिनियाव समाइ लाबाय, “जेखौनो नों बिगोन बिखौनो आं होगोन आंनि हादरनि खावसे बाहागोखौब्लाबो।”

<sup>24</sup>हिनजावसाया गावनि बिमानि खाथिआव थांबाय आरो सोंबाय, “आंनि थाखै राजा हेरदनिआव आं मा बिनांगौ।”

बिनि बिमाया फिनबाय, “जहन बाप्टिसमानि खर'खौ बि।”

<sup>25</sup>बे समावनो हिनजावसाआ राजानियाव थांफिनानै बिखौ बुंबाय, “अननानै आंनो जहन बाप्टिस्मानि खर'खौ हर। दानो बिखौ आंनो थुरसिआव लाबो।”

<sup>26</sup>हेरद राजाया जोबोर दुखु जाबाय, नाथाइ बियो बिनियाव लानाय समाइखिराखौ गावनि आलासिफोरनि मोखांडाव सिफायनो गोसो जायासै।<sup>27</sup>अब्ला बियो सान्त्रिफोरखौ थोनहरबाय जहननि खर'खौ दानस'नानै गावनि सिम लाबोनो होबाय। सान्त्रिफोरा जोबथे सालिआव थानानै जहननि खर'खौ दानस' हैबाय।<sup>28</sup>बियो खर'खौ थुरसिआव लाबोनानै हिनजावसानो होबाय, आरो हिनजावसाया बेखौ बिमानो होबाय,<sup>29</sup>जहननि सेलाफोरा गासै जाथाय फोरखौ खोनाबाय, अब्ला बिसोरो फैनानै जहननि मोदोमखौ लानानै मांखरआव दोनहैबाय।

### जिसुआ हाजार बा मानसिफोरनिखुइ बांसिनखौ जाहोनाय

<sup>30</sup>जिसुआ जाय थोनहरजानायफोरखौ थोनहरदंमोन बिसोरो बिनिआव फैफिनबाय। बिसोरो गासैबो बिनि सोरगिदिं थाबाय आरो बिसोर गावसोर मावनाय, आरो फोरोंनाय फोरखौ बिनो खोन्थाबाय।<sup>31</sup>जिसु आरो बिनि सेलाफोर मोनसे जायगायाव जोबोर मुखुब जानानै दंमोन। बैयाव हाय गोबां मानसिफोर दंमोन। जेराव बि आरो बिनि सेलाफोरा जानोबो सम मोनज्लायाखैसै। बियो बिसोरखौ बुंबाय, “आंजों फै, जों निजोम जायगायाव थानानै थाहैनोसै। बैयाव हाय जों दसे जिरायनो मोनगोन।”

32अब्ला जिसु आरो बिनि सेलाफोराल' थांबाय। 33नाथाइ गोबां मानसिफोरा बिसोर थांनायखौ नुनानै सिनायदों अब्ला मानसिफोरा गासै नोगोरनिफ्राइ खारलांनानै बै जायगाफोराव थांदों जेराव बिसोर थांगोन आरो जिसुनि सिगां सहैप्रोदों। 34जेब्ला जिसुआ नावनिफ्राइ ओंखार बोयो, बियो गेदेर हानजाखौ नेनानै थानाय नुबाय। बियो बिसोरनि थाखाय दुखु मोनबाय, मानोना बिसोर लावखार गोयै मेन्दाफोर बादि। अब्ला बियो मानसिफोरखौ गोबां फोरों बावबाय।

35साना जेब्ला बेलासे जायो, अब्ला जिसुनि सेलाफ्रा बिनिआव फैनानै बुंबाय, "रावबो बे जायगानि सोरगिदिं थाया आरो दा समा गोबाव जाबाय। 36बिनिखायनो मानसिफोरखौ थोनहरदो। बिसोरो बे जायगानि सोरगिदिं आबादनि फामु आरो नोगोर फोराव थांनानै जाग्रा मुवाफोर बायहै नांसिगौ।"

37नाथाइ जिसुआ फिनबाय, "नोंसोर बिसोरनो जानो थाखै माबा मोनसे होदो।"

बिसोरो जिसुखौ बुंबाय बिसोरखौ जाहोजोबनो जों थोजासे सिथाव बायनो हानाय नडा। जों गासै दान मोनसे खामानि मावनांगोन बिसोर गोसैनोबो जाहो जोबनो सिथाव बायनांगौब्ला।

38जिसुआ बिसोरखौ सोंबाय, "नोंसोरहा दायो बेसेबां सिथाव दड थांनानै नायहै?"

बिसोरो गावसोरनि सिथावखौ सानबाय। बिसोरो जिसुनियाव फैनानै बुंबाय जोंहा मोनबा सिथाव आरो ना मानै दंड।

39अब्ला जिसुआ बिसोरखौ बुंबाय, "गासैखौबो बुंदो हानजा जानानै बे गांसोआव ज'नो।" 40अब्ला मानसिफोरा हानजा जानानै ज'बाय। हानजा फोराव बाजि एबा जौसे मानसिफोर दंमोन।

41जिसुआ बे मोनबा सिथाव आरो ना मानैखौ लाबांय। बियो अखांथिं नायदावनानै ईशोरखौ जाग्रा मुवानि थाखै हामबाय होनबाय। अब्ला बियो सिथावखौ बोफ्लेनानै गावनि सेलाफोरनो होबाय। आरो बियो ना मानैखौबो बेयाव थानाय गासैनोबो राननानै होबाय।

42बिसोर गासैबो जाखांनायनि उनाव। 43सेलाफोरा गासै गुन्द्रा गुन्द्रिखौ जिने खादा ना आरो सिथावखौ हुथुम बावबाय। 44बेयावहाय गासै हाजारबा हौवाफोर दंमोन जायफ्रा जादों।

### जिसुआ दै सा सा थाबायनाय

45अब्ला जिसुआ सेलाफोरखौ नावनि सिंडाव हाबनो होबाय, बियो बिसोरखौ लैथो बारै बेटसाइदाआव थानो थोनबाय। बियो बुंबाय आं उनाव फैगोन। बियो बियाव थानानै गासैखौबो न'आव थोनहरसांबाय। 46बियो गासै खौबो बिदाय लानानै, आरज खालामनो थाखै बियो हाजोआव थांबाय।

47बे हराव नावआ लैथोनि गेजेरावमोन। जिसुआ हागुंआव हारसिल' मोन। 48बियो नावखौ लैथोनि गोजानाव थांनाय नुबाय। आरो बियो नुहुरदों सेलाफ्रा नावखौ जावलांनो गोब्राब मोनदों। बारआ बिसोरनि उल्था बारदों। नखा नायसि नायसि थाम आरो द'रिंगानि गेजेराव दै सा सा थाबायनानै जिसुआ नावनि खाथिआव थांबाय। जिसुआ नावखौ बारलांहां जाजासिम थाबाय लांबाय थाबाय। 49नाथाइ सेलाफोरा जिसुखौ दै सा सा थाबायलांनाय नुबाय, बिसोरो बिखौ बहुतसो साननानै होत्रिखावबाय। 50बिसोर बयबो बिखौ नुनानै गिबाय। नाथाइ जिसुआ बिसोरखौ बुंबाय, जिंगा दासि बियो आंसो?गिनो नाडा।” 51जेब्ला बियो सेलाफोरजों नावनि सिंडावहाबो, बारा थाबथाबाय। बिनि सेलाफोरा थारैनो सोमो नांबाय। 52बिसोरो फोथायनो हायाखैसै बियो मात्रै जाखो? बियो हाजारबा मानसिफोरखौ जाहोनायाव मावनाय सोमोनांथाव खामानि बादि। अब्लाबो बिसोरो बिनि ओंथिखौ बुजियासै।

### जिसुआ गोबां जन्नाफोरखौ सोखानाय

53जिसु आरो बिनि सेलाफोरा लैथो बारै गिनेसारेतनि हागुडाव थांबाय। बिसोरो बेयाव नावखौ खाथाबनानै दोनबाय। 54जेब्ला बिसोरो नावनिफ्राइ ओंखारो मानसिफोरा बैयाव जिसुखौ नुबाय, बिसोरो बिखौ मिथिगौमोन बियो सोर। 55बिनिखायनो बिसोरो गुबुनफोरनो खोनथानो जायगाफोराव खारलांबाय। जिसुआ जेरावनो थांडो गासै जायगायावबो बिसोरो जन्नाफोरखौ सांडैआव बानानै लाबोदों। 56जिसुआ बै जायगानि सोहोर, नोगोर आरो आबाद फामु जेरावबो थांदों। आरो बे थांनाय गासै जायगायावबो, मानसिफोरा हाथाइफोराव जन्नाफोरखौ लाबोदों। आरो बिसोरो बिनि गाननाय सि रुबैआव दांहोने खावलायदों। आरो जायफोरा बिखौ दांदों बिसोर गासैनिबो बेरामा गादों।



## ईशोरनि आयेन आरो मानसिनि हुदाफोर

**7** <sup>1</sup>माखासे फारिसाइफोर आरो जिरुसालेमनिफ्राइ फैनाय माखासे आयेन गुरुफोरा जिसुनि सोरगिदिं ज'जाफैबाय। <sup>2</sup>बिसोर नुबायदि माखासे जिसुनि सेलाफोरा आखाइ सुवा लासिनो ओंखाम जानायखौ, ओंथिआ जाबाय, बिसोरो आखाइ फोरखौ हुदा बादि सुवाखैमोन। <sup>3</sup>फारिसाइ आरो गुबुन गासै जुदायारिफोरा माब्लाबाबो हुदाबादि आखाय सुवालाबानो जायामोन। बिसोरो बेफोर हुदाफोरखौ आजै आजौनिफ्राइनो फालिबोदों। <sup>4</sup>आरो जेब्ला बिसोर जुदायारि फोरा हाथायाव माबाफोर बाइयो, बिसोरो हुदाफोर बादि सुवालासिनो जायामोन। बोसोरो आजै आजौनि गुबुन हुदाफोरखौ मानिबोदोंमोन। बिसोरो हुदाफोर मानियोमोन जैरे थोरसि खुरि, आरो ल'थाफोर सुनायनि।

<sup>5</sup>फारिसाइफोर आरो आयेन गुरुफोरा जिसुनियाव बुंबाय। “नोंनि सेलाफोरा आजै आजौनि हुदाफोरखौ फालिआ। बिसोरो हुदाफोर बादि आखाय सुवालासिनो ओंखाम जायो। बिसोरो मानो बेबादि मावो?

<sup>6</sup>जिसुआ फिनबाय, “नोंसोर गासैबो दिन्थिफाग्लाफोर? जिसया नाबिया नंगौ जेब्ला बियो बिफोर बाश्राफोरखौ ईशोरनिफ्राइ नोंसोरनो लिरदों।

‘बिसोर मानसिफ्रा गावसोरनि बाश्राफोरजों मान होयो

नाथाइ आडो थारैनो बिसोरनो गोनांथि नडा।

<sup>7</sup> बिसोरनि आंखौ सिबिनाया बेसेन गैयि।

बिसोरनि फोरोंनाया मानसिनि हुदाफोरल'सो।

जिसया 29:13

<sup>8</sup>नोंसोरो ईशोरनि हुकुमफोर मानिनायखौ दोन्थ'नानै, मानसिफोरनि फसंनाय हुदाफोरखौसो मोजां मोनो।

<sup>9</sup>अब्ला बियो बुंबाय नोंसोर गोबां खाइदाफोरजों ईशोरनि फोरोंनायफोरखौ नागारो। जाहाथे नोंसोर गावसोरनि फोरोंनाय फोर खौ मानिनो हायो। <sup>10</sup>मुसिआ बुंबाय, नोंसोर गावनि बिमा बिफाखौ मान हो। बियो बुंबावबाय, जाया गावनि बिमा बिफाखौ

माबाफोर गाञ्जि बुडो, बियो बुथार जानांगौ, <sup>11</sup>नाथाइ नोंसोरो फोरोडो मानसिफ्रा गावनि बिमा एबा बिफारखौ बुंनो हायो। “आंहा माबा दं, आडो नोंखौ हेफाजाब होनो बाहायनो हागौ। नाथाइ आडो बेफोरखौ नोंनो बाहाया। आडो बैखौ ईशोरनो होगोन। <sup>12</sup>नोंसोरो मानसिफोरखौ बुंदोंमोन दि, बिसोरहा गावनि बिमा बिफानि थाखै जेबो मावनांगौ गैया। <sup>13</sup>बिनिखायनो नोंसोरो फोरोडोदि ईशोरनि बुंनाया गोनांथि नडा, नोंसोरो गावसोरनि फोरोबोनाय हुदाफोरखौसो गोनांथि सानो, जायफोरखौ नोंसोर गुबुनफोरनोबो होबोदों। आरो बेबादिनो गोबांथार खामानिखौ मावो।

<sup>14</sup>जिसुआ मानसिफोरखौ गावनियाव लिंहरबावनानै होनबाय, “गासैबो आंनि बुंनायखौ खोनासंनानै आरो मा बुंदों बुजिनानै लादो। <sup>15</sup>बेयावहाय जेबो मुवा गैया मानसिआ गावनि खुगायाव सोनानै गावखौ गाञ्जि खालामनो हानाय। मानसिफ्रा गाञ्जि जायो गावनि सिंनिफ्राइ ओंखार बोनायजोंसो। <sup>16</sup>नोंसोर मानसिफोर जाया आंखौ खोनाबाय खोनासं!”

<sup>17</sup>जेब्ला जिसुआ मानसिफोरखौ नागारनानै न'सिडाव हाबहैयो सेलाफोरा जिसुनियाव सोंबाय, जिफोरखौ बियो मानसिफोरनो बुंदोंमोन। <sup>18</sup>जिसुआ बुंबाय, नोंसोरहा दाबो बुजिनायाव जेंना दड? थारैनो नोंसोर मिथिगौ ईशोरजों बायरानिफ्राइ खुगायाव हाबनाय जेबो मुवाया मानसिखौ ईशोरजों नाजावजायै खालामा। <sup>19</sup>ओंखामा मानसिनि मेलेमआव थाडा। बियो उदैआवसो थाडो। आरो बियो मोदोमनिफ्राइ ओंखार लांडो।” जेब्ला जिसुआ बेखौ बुंदों अब्ला बिनि ओंथिआ जाबाय बेबादि जेबो जानाय मुवा गैया जायफोरखौ जानानै मानसिआ गाञ्जि जायो।

<sup>20</sup>आरो जिसुआ बुंदों, “मानसिखौ गाञ्जि खालामनाय मुवाफोरा सिंनिफ्राइसो फैयो। <sup>21</sup>बेफोर गासै गाञ्जि फोरा मानसिनि मेलेमनि सिंडावसो जायो: गाञ्जि साननाय, ओथोनारि फाप, खावनाय, बुथारनाय, <sup>22</sup>जिनाहारि खालामनाय, लुबैनाय, मानसिफोरनि थाखै गाञ्जि मावनाय, थगायनाय, गाञ्जि आखुनि मावनाय, मेगन सानाय, मानसिफोरखौ लाजि फोनांनाय, दुबगां बुंनाय, आरो मुख बायदि जिउ खुंनाय। <sup>23</sup>बेफोर गाञ्जि साननायफोरा मानसिनि सिंनिफ्राइ फैयो। आरो बेफोरनो मानसिखौ ईशोरजों नाजाव जाथावयै खालामो।”

### जिसुआ जुदायारि नडैः हिनजावखौ हेफाजाब खालामनाय

24जिसुआ बिनिफ्राइ थुर जायगानि सोरगिदिं जायगायाव थांदो। बियो बे जायगानि मानसिफोरखौ गाव बेयाव दंफैयो होननानै मिथिनायखौ लुबैयाखै मोन। बिनिखायनो बियो न'आव हाबहैबाय। नाथाइ बियो थाखोमानानै थांनो हायासै। 25सासे हिनजावा खोनाबाय बियो बेयाव दंफैयो होननानै। बिनि उन्दै फिसाजोनिआव गात्रि जिउ दंमोन। अब्ला हिनजावआ जिसुनियाव फैबाय आरो बिनि आर्थेनि खाथियाव गुग्रुबनानै खुलुमबाय। 26बियो जुदायारि नडामोन। बियो सुरिया हादरनि फैनिसिया आव जोनोम जानायमोन। बियो जिसुखौ खावलायबाय बादुवा जिउखौ गावनि फिसाजोनि मोदोमनिफ्राइ होखार हरनो।

27जिसुआ हिनजावखौ बुंबाय, “गथ’ निफ्राइ सिथावखौ लानानै सैमानो होनाया थिक जानाय नडा गिबियावनो गथ’आ जाप्रोथों जेसेबां बिसोरनो नांगौ।”

28बियो फिनबाय, “बियो नंगौ फोरबु। नाथाइ सैमाफोरा आरांगानि सिंनिफ्राइ सिथावनि गुन्द्रा गुन्द्रिखौ जानो हायो जायखौ गथ’फोरा जाया।”

29अब्ला बियो बिखौ बुंबाय, “बे फिननाया जोबोर मोजां नों थांनो हासिगौ। बादुवा जिउआ नोंनि फिसाजोखौ नागारनानै थांबाय।”

30हिनजावा न'आव थांबाय आरो गावनि फिसाजोखौ बिसिनायाव उन्दुना थानाइ मोनहैबाय। बादुवा जिउआ थांबायमोन।

### जिसुआ सासे बेंगा मानसिखौ सोखानाय

31जिसुआ थुर जायगाखौ नागारनानै सिदननि गेजेरजों थांबाय। गालिल लैथोनि लामायाव बियो जि नोगोरफोरनि गेजेरजों थांबाय 32जेब्ला बियो बैयाव दंमोन, माखासे मानसिफ्रा सासे मानसि बिनियाव लाबोबाय जाया बेंगा आरो मोजाडै राइज्जलायनो हाया। मानसिफोरा खावलायबाय जिसुनि आखायखौ मानसिनि सायाव होनानै सोखानो थाखै।

33जिसुआ बे मानसिखौ हारसिडैः गोजानआव मानसिफोरनिफ्राइ गावजों लानानै थांबाय। बियो गावनि आसिखौ मानसिनि खोमायाव सोबाय। अब्ला बियो आसियाव खुदु मुजुबाय आरो मानसिनि सालायखौ दांबाय 34जिसुआ अखांथि नायदावनानै

गोबारे गाबरखाव नानै बियो बुंबाय, “इफ्फाता” बिनि ओथिया “गेवदो।” <sup>35</sup>जेब्लानो जिसुआ बेखौ मावबाय मानसिया खोनानो हाबाय। बियो गावनि सालायखौ बाहायनो हाबाय, आरो बियो मोजाडें राइज्जलायनो हाबाय।

<sup>36</sup>जिसुआ मानसिफोरखौ बुंबाय बेफोरखौ रावनोबो खिन्था हैनांडा।। नाथाइ जेसेनो बियो खिन्था नाडा होननानै बुंडो एसेबांनो बिसोरो मानसिफोरनो खिन्थादों। <sup>37</sup>बिसोर गासैबो थारैनो सोमो नांदों। बिसोरो बुंदों, “नायलाइ बियो मा मावदों। बेफोर गासैबो मोजां। बियो बेंगा मानसिखौ खोना होदों आरो गोदान रावफोर होदों जाय मानसिफ्रा रायज्जलायनो हायामोन।”

### जिसुआ हाजारब्रैनिखुइ बांसिन मानसिफोरखौ जाहोनाय

**8** <sup>1</sup>गुबुन मोनसे समाव जिसुजों गोबां मानसि दंमोन। मानसिफोरहा जानो थाखै जेबो गैयामोन। अब्ला बियो गावनि सेलाफोरखौ गावनिआव लिंहरनानै बुंबाय, <sup>2</sup>“आं बे मानसिफोरनि थाखै दुखु मोनदों। बिसोरो आंजों थाफानाया सानथाम जाबाय, आरो दायो बिसोरहा जानो थाखै जेबो गैला। <sup>3</sup>आं बिसोरखौ उखै जानानै न’आव थांनो होनो नाडा। जुदि बिसोरो जाया लासिनो थांडोब्ला, बिसोरो न’आव थांनाय लामायवनो गोग्लै लांगोन। खायसेआ बिनिफ्राइ गोजान जायगायाव थायो।”

<sup>4</sup>जिसुनि सेलाफ्रा फिनबाय, “नाथाइ जों नोगोरनिफ्राइ जोबोर गोजानाव, जों बहानिफ्राइ एसेबां गोबां सिथाव मोनगोन बिसोर मानसिफोरखौ जाहो जोबनो?”

<sup>5</sup>अब्ला जिसुआ बिसोरखौ सोंबाय, “नोंसोरहा बेसेबां सिथावफोर दंड?”

बिसोरो फिनबाय, “जोंहा स्नि सिथाव फोर दंड।”

<sup>6</sup>जिसुआ मानसिफोरखौ हायाव ज’नो थोनबाय, अब्ला बियो स्नि सिथावखौ लाबाय आरो ईशोरखौ हामबाय होनबाय। बियो सिथावखौ बोप्लेनानै गावनि सेलाफोरनो होबाय। बियो बिसोरखौ बुंबाय सिथावखौ मानसिफोरनो होदो आरो बियो जेरै बुंबाय बे बायदि बिसोरो मावबाय। <sup>7</sup>सेलाफोरहा एसे ना बो दडोमोन। जिसुआ नानि थाखैबो हामबाय होनबाय आरो ना खौबो मानसिफोरनो होनो थाखाय बिसोरखौ बुंबाय।

<sup>8</sup>बिसोरो गासैबो जाबाय उदै बुडा जासिम। अब्ला सेलाफ्रा स्नि खादा सिथाव हुखां

बावबाय आग्लायनानै बायफ्लेनाय सिथावफोरखौ।<sup>9</sup>बैयावहाय गासै हाजारब्रैनिखुइ बांसिन हौवाफोर जादोमोन। बिसोर जाखांनायनि उनाव, जिसुआ बिसोरखौ न'आव थांनो थिनबाय।<sup>10</sup>अब्ला बियो गावनि सेलाफोरजों लोगोसे नावआव गाखोनानै दालमानुथायाव थांबाय।

### माखासे मानसिफोरा जिसुनि एकथियारखौ सन्देह खालामनाय

<sup>11</sup>फारिसाइफोरा जिसुनियाव फैनानै बिखौ सौलुफोर सोंबाय। बिसोरो बिखौ आनजाद लानो सानबाय। बिनिखायनो बिसोरो बिखौ बुंबाय ईशोरनिफ्राइ मोनसे सोमो गोनां हांखो दिन्थि।<sup>12</sup>जिसुआ गोलाव हांमा सुरनानै बुंबाय, “नोंसोर मानसिफोरा मानो सोमो नांथाव हांखो नायनो सोंखो? आं नोंसोरखौ नंथारगौयै मिथि होयोदि नोंसोरनो सोमो नांथाव फोरखो फोरमान होनो थाखाय मुंबो मावनाय जानाय नडा।”<sup>13</sup>अब्ला जिसुआ बिसोरखौ नागारनानै नावआव गाखोनानै लैथोनि गुबुन फारसे थांबाय।

### जिसुनि सेलाफोरा बिखौ गोरोन्थि बुजिनाय।

<sup>14</sup>जिसुनि सेलाफोरहा नावआव गुरसेल' सिथाव दंमोन। बिसोरो गोबां सिथावफोर लांफानो बावबाय।<sup>15</sup>जिसुआ बिसोरखौ होनदों, खबरदार, फारिसाइफोरनि एमाव आरो हेरदनि एमाव निफ्राइ।

<sup>16</sup>सेलाफोरा बिनि ओथिनि सोमोन्दै सावरायबाय। बिसोरो बुंदों, “जोंहा सिथाव गैयैनि थाखै बियो बिखौ बुंबाय।”

<sup>17</sup>जिसुआ मिथिगौदि, सेलाफोरा बिनि सोमोन्दै रायज्जायदों। अब्ला बियो बिसोरखौ सोंबाय, “मानो नोंसोरो सिथाव गोयैनि सोमोन्दै रायज्जायदों? दासिमबो नोंसोर नुवाखै आरो बुजियाखै ना? मा नोंसोरहा बुजिनो हानाइ गोहो गैया ना? <sup>18</sup>नोंसोरहा, मेगन दंड अब्लाबो नुवा? नोंसोरहा खोमा दंड अब्लाबो खोनाया गोसोखां सिगाडाव आं मा मावखो, जेब्ला जोंहा थोजासे सिथाव गैयामोन? <sup>19</sup>आं मोनबा सिथावखौ हाजारबा मानसिफोर नो रानना होबाय। गोसोआव दंड ना जों बेसेबां खादा गुनद्रा गुनद्रि जायै सिथावफोरखौ हुखां दोंमोन?

सेलाफोरा फिनबाय, “जों जिनै खादा हुखांदों।”

20आरो जेब्ला आं स्नि सिथावखौ हाजार ब्रै मानसिफोरनो रानना होदोंमोन, नोंसोरो बेसेबां खादा आग्लायनाय सिथावखौ हुखां बावनायमोन?”

बिसोरो फिनबांय, “जों स्नि खादा हुखांबाय।”

21अब्ला बियो बिसोरखौ होनबाय नोंसोरो आंनि बेफोर मावनायफोरखौ गोसो खांबाय, नाथाइ नोंसोर दाबो बुजियाखै।

### जिसुआ बेथसाइदाआव सासे खाना मानसिखौ सोखानाय

22जिसु आरो बिनि सेलाफोरा बेथसायदायाव फैबाय। माखासे मानसिफोरा सासे खाना मानसिखौ बिनियाव लाबोनानै बिखौ खावलायबाय मानसिखौ दांनो थाखाय। 23अब्ला जिसुआ बे खाना मानसिनि आखायखौ हमबाय आरो बिखौ गामिनि बायरायाव लानानै थांबाय। अब्ला बियो मानसिनि मेगनाव मुजुदै मुजुनानै होबाय। बियो गावनि आखायखौ दांनानै सोंबाय, “नोंडो दायो नुबाय ना?”

24अब्ला मानसिआ नायदावनानै बुदों, “औ आं मानसिफोर नुदों। बिसोरखौ दंफाफोर बादि सोरगिदिं थाबायनाय नुदों।”

25जिसुआ आरोबाव बे मानसिनि मेगनाव दांबावदों, आरो मानसिआ मेगनखौ गुवारै बेखेवबाय। बिनि मेगना सोखाजाबाय। आरो बियो गासैखौबो स्रायै नुदों। 26जिसुआ बिखौ होनबाय, न’आव थांदो। बियो बुंबाय, नोंडो सोहोराव दांथा।”

### पितरा बुदों जिसुआ खिष्ट’

27जिसु आरो बिनि सेलाफोरा कैसरिया फिलिपि जायगानि सोहोराव थांबाय। जेब्ला बिसोरो दावबाय दोंमोन, जिसुआ गावनि सेलाफोरखौ सोंबाय, “मानसिफ्रा आंखौ सोर होनना बुंडो?”

28बिसोरो फिनबाय, “माखासे मानसिफोरा बुडो जहन बाप्टिस्मा, माखासेफोरा बुडो एलिजा, आरो गुबुन माखासेआ बुडो नाबिफोरनि सासे।”

29अब्ला जिसुआ सोंदों नोंसोरो आंखौ सोरखौ होननानै सानो?”

पितरा फिनबाय, “नोडो ख्रिष्ट।”

<sup>30</sup>जिसुआ सेलाफोरखौ बुदों, “आंडो सोर बेखौ रावनोबो दाखोनथा।”

### गाव थैनांगोनखौ जिसुनि रायथिनाय

<sup>31</sup>अब्ला जिसुआ गावनि सेलाफोरनो गाव सैनांगोनखौ फोरोंनो हमबाय। बियो फोरोंदो दि, मानसिनि बिसा हौवाया जुदायारिनि गागिफोर, देरसिन दौरिफोर, आरो आयेन फोरोंगुरुफोरजों नाजावजानाय नडा। बियो बुंदोंदि, मानसिनि बिसा हौवाया बुथार जागोन आरो सानथामनि उनाव सिखां फिनगोन। <sup>32</sup>जिसुआ गासै जागोन फोरखौ खिनथाजोबदों। बियो जेबो दोनखुमायाखैसै।

पितरा जिसुखौ गुबुन सेलाफोरनिफ्राइ हारसियै लिंखनानै रायज्जलाय हैबाय। बेफोरखौ बुंनायनि थाखै पितरा बिखौ सोंखारिदों। <sup>33</sup>नाथाइ जिसुआ गावनि सेलाफोरनिथिं गिदिंनानै पितरखौ सोंखारिफिनदों। बियो पितरखौ बुंदों, “नोडो सैतान आंनिफ्राइ गोजान जा। नॉनि साननायफ्रा ईस्वोरनि थाखै मावनायखौनो गोसो होआ। नों मानसिफ्रा मा सानो बेफोरखौल'सो गोनां सानो।”

<sup>34</sup>अब्ला जिसुआ मानसिनि हानजाफोर आरो गावनि सेलाफोरखौ लिंहरनानै बुंबाय, “सोरबाफोर आंजों फैफानो गोसो दडब्ला गावनि थाखै साननाय आरो नागिरनायखौ गारनानै नोंसोरो खुसखौ बाननो थाम-थिम जानांगोन, जायखौ आंनि उन उन फैनायनि जुनै होनाय जादों। <sup>35</sup>जायफोरा गावनि जिउखौ बासायनो गोसो जायो बियो जिउमाखौ खोमागोन। नाथाइ जायफोरा गावनि जिउखौ आंनि थाखै आरो गाहाम रादाबनि थाखै होगोन बियो बासाय जागोन। <sup>36</sup>बियाव जेबो मोनदेरनाय गैया बुहुमखौनो मोनजोबनानै गासै जिउखौ खोमायोब्ला। <sup>37</sup>नोंनियाव थानाय गासै मुवाखौ होनानैबो गावनि जिउखौ बायफिननो हाया। <sup>38</sup>दिनै मानसिफोरा गोबां फापि। बिसोरो ईशोरजों फोथाय जाथावना जायाखै आरो नोंसोर बिसोरजों लोगोसे दं आरो आंनि फोरोंनायखौ दालाजि। जुदि बेबादि जायोब्ला। आंबो नोंसोरखौ लाजिगोन गोथार आरफ' जों लोगोसे बिफानि महिमाजों फैफिनब्ला।”

**9** <sup>1</sup>अब्ला जिसुआ बुंबाय, “आंखौ फोथाय जेब्ला आं बुदों नोंसोरनि माखासे गसंनाय मानसिफोरा थैनायनि सिगां ईशोरनि रायजोआव फैगोन।”

### जिसुजों मुसि आरो एलिजाखौ नुफानाय

<sup>2</sup>द' साननि उनाव, जिसुआ, पितर ,जाकुब आरो जहनखौल' लानानै थरसे गोजौ हाजोआव गाखोलांबाय। जेब्ला बिसोर सेलाफ्रा बिखौ नायहरदों अब्ला जिसुनि मुसिया सोलायदों। <sup>3</sup>बिनि गाननाय हिफ्रा गुफुर जानानै मोदानबाय बहुमाव थानाय रावबो बेबादि गुफुरसिन खालामनो हाया। <sup>4</sup>अब्ला सानै मानसि जिसुजों बैयाव रायज्जायदों बिसोर एलिजा आरो मुसि।

<sup>5</sup>पितरा जिसुखौ बुंबाय, “फोरोंगुरु, जों बेयाव थानाया गाहाम जागोन। जोडो बेयाव गंधाम देरा लुगोन, गंसेआ नोंनो, गंसेआ मुसिनो, आरो गुबुन गंसेआ एलिजानो।” <sup>6</sup>पितरआ जेबो मिथियाखै मा बुंफिननांगौ। मानोना बि आरो गुबुन सानै सेलाफोरा जोबोर गिदोंमोन।

<sup>7</sup>अब्ला जोमैआ फैनानै बिसोरखौ खोबथेबाय जोमैनिफ्राइ बेबादि राव फैदों। “बियो आनि बिसा हौवा, जायखौ आं अनो बिखौ मानि।”

<sup>8</sup>सेलाफ्रा नायगिदिंबाय, नाथाइ बिसोरो गावसोरजों लोगोसे जिसुखौल' नुनो मोनदों। <sup>9</sup>जेब्ला जिसु आरो सेलाफ्रा हाजोनिफ्राइ ओंखारबोनानै थाबाय बोफिनो, बियो बिसोरखौ बेबादि बिथोन होदों। “रावनोबो खिनथानो नाडा जायखौ नोंसोरो हाजोआव नुबाय। नोंसोरो नेथ' जेब्लासिम मानसिनि बिसा हौवाया थैनायनिफ्राइ थांखांफिना।” बिनि उनाव नोंसोर मानसिफोरनो खिन्था, नोंसोर हाजोआव मा नुखो।

<sup>10</sup>बिनिखायनो सेलाफ्रा जेबो बुंडा लासिनो नेथ'बाय गावसोर मा नुखो, नाथाइ बिसोरो गावजों गाव रायज्जाइदों जिसुनि थैनानै थांखांफिनगोन खोथाया मा। <sup>11</sup>बिसोरो बिखौ सोंबाय, “आयेन फोरोंगुरुफोरा मानो बुडों एलिजाया सिंगा कैग्रोथारनांगोन?”

<sup>12</sup>जिसुआ फिनबाय, “बिसोरनि बुंनाया नंगौ दि, एलिजाया सिंगा कैग्रोनांगोन। जैरेबायदि जानांगौ बेफोर गासैखौबो एलिजाया खालाम जोबबाय। नाथाइ सास्थोरा मानो बुडो जे मानसिनि बिसाया गोबां सैसो नांगोन आरो बै मानसिफ्रा सानगोन



बियो जेबो बेसेन गैया <sup>13</sup>आं नोंसोरखौ बंडो एलिजाया फैखाबाय। आरो मानसिफ्रा गासै गाज्रिखौ मावबाय बिनि सायाव। सास्थोरा बंदों बेफोर गासैबो बिनि जिउआव जागोन।”

### जिसुआ सासे हौवासा गथ'खौ गाज्रि जिउनिफ्राइ उदांसि होनाय

<sup>14</sup>जेब्ला जिसु, पितर, जाकुब आरो जहनआ गुबुन सेलाफोरनिआव थांडो। बिसोरो गोबां मानसिखौ गावसोरनि सोरगिदि नुबाय।आयेन फोरों गुरुफोरा सेलाफोरजों बाश्रा दानथे लायबाय थादोंमोन। <sup>15</sup>जेब्ला मानसिफोरा जिसुखौ नुबाय,बिसोरो सोमो नांदों आरो बिसोरो बिखौ बरायनो थाखाय खारलांदों।

<sup>16</sup>जिसुआ सोंबाय, “नोंसोर मा बाश्रा दानथेज्जलायदों आयेन फोरोंगुरु फोरजों?”

<sup>17</sup>सासे मानसिया फिनबाय, “फोरोंगुरु आं आंनि गथ'खौ नोंनिआव लाबोदोंमोन। बियो गाज्रि जिउजों दैदेन जादोंमोन बैफोरो बिखौ रायज्जलायनायनिफ्राइ हमथा दोंमोन। <sup>18</sup>जिउआ बिखौ नाखेबदों आरो हायाव बिखौ गारफ्लेदों।बिहा खुगानिफ्राइ फेमफोना ओंखार दों, हाथाइफोरखौ अरखे दों, आरो मोदोमा गोरा जादों। आं नोंनि सेलाफोरखौ बंडुबाय बे गाज्रि जिउखौ होखार हर नाथाइ बोसोरो हायासै।”

<sup>19</sup>जिसुआ फिनबाय, “नोंसोर मानसिफ्रा दिनै फोथाइ नांडा!बेसेबां सम आं नोंसोरजों थागोन?नोंसोरखौ बेसेबां गोबाव आं स'हाय बावनांगौ? गथ'खौ आंनियाव लाबो!”

<sup>20</sup>अब्ला सेलाफोरा हौवासा गथ'खौ जिसुनियाव लाबोबाय। जेब्ला गाज्रि जिउआ जिसुखौ नुयो, बियो गथ'खौ नाखेबनो हमबाय। गथ'आ हायाव गोग्लैबाय आरो लुद्रायनो हमबाय। बिहा खुगानिफ्राइ फेंफोना ओंखारबाय।

<sup>21</sup>जिसुआ गथ'नि बिफानिआव सोंबाय, “बेबादि जानाया बेसेबां गोबावनिफ्राइ?”

बिफाया फिनबाय,जेब्ला बियो जोबोर उन्दैमोन।” <sup>22</sup>गाज्रि जिउआ बिखौ जेब्लाबो बुथारनो थाखै अराव एबा दैयाव गारसोमबाय थायो। जुदि नों माबाफोर खालामनो हायोब्ला, अननानै जोंखौ सहाय खालामदों।”

<sup>23</sup>जिसुआ बिफानो बंडुबाय, “नों मानो बंदों। जुदि हायोब्ला? गासैबो जाफुंगोन जाया फोथायगोन।”

24हरखाबैनो बिफाया होखावबाय, “आं फोथायो आंखौ गोबां फोथायनो हेफाजाब खालाम!”

25जिसुआ नुबाय जे गोबां मानसिफ्रा बेयाव खारलांदों मा जादों बेखौ नायनो। अब्ला बियो गात्रि जिउखौ बुंबाय बेंगा आरो रायज्लायनो होबथाग्रा जिउ आं नोंखौ बिथोन होयो बिनिफ्राइ ओंखार बो आरो बिनियाव माब्लाबाबो फैफिननो नंलिया!”

26गात्रि जिउआ होखावबाय। बियो आरोबाव गथ’खौ हायाव खोख्लैबावबाय। आरो बियो ओंखार बोबाय। गथ’खौ थैनाय बादि नुबाय। गोबां मानसिफ्रा बुंबाय, “बियो थैबाय।” 27नाथाइ जिसुआ बिनि आखायखौ हमबाय आरो बिखौ गसंनो हेफाजाब खालामबाय।

28अब्ला जिसुआ न’आव थांबाय। बिनि सेलाफोराल’ बिजों बेयाव दंडमोन। बिसोरो बुंबाय, “जों मानो बे गात्रि जिउखौ होखारनो हायाखैसै?”

29जिसुआ फिनबाय, “बै बायदि गात्रि जिउखौ होखारनोब्ला आरज आरो उदै बासिनायजोंसो हायो।”

### जिसुआ गावनि थैनायनि सोमोन्दै रायथिनाय

30जेब्ला जिसु आरो बिनि सेलाफोरा बे जायगाखौ नागारनानै गालिलनि गेजेरजों थांदों। जिसुआ मानसिफोरनो गाव बहा दं बिखौ मिथि होनो नागिराखै। 31बियो गावनि सेलाफोरखौल’ फोरोंनो नागिरदोंमोन। बियो बिसोरखौ बुंबाय, “मानसिनि बिसा हौवाया गुबुन सामलायग्रा मानसिनि आखायाव गथाय जागोन। जाया बिखौ बुथारगोन। सानथामनि उनाव बियो थैनायनिफ्राइ थांखांफिनगोन।” 32नाथाइ सेलाफ्रा बिनि बुंनायनि ओंथिखौ बुजियाखैसै, आरो बिसोरो बिनियाव सोंफिननो गिबाय।

### सोर देरसिन

33जिसु आरो बिनि सेलाफोरा कापारनाहुमाव थांबाय। बिसोरो न’आव थांबाय आरो जिसुआ बिसोरखौ बुंबाय, “आं खोनादों नोंसोरो दिनै लामायाव बाश्रा दानथेलायदों।

मा बाश्राखौ लानानै दानथे लायदोमोन?" 34नाथाइ सेलाफ्रा जेबो फिननाय होआखैसै, मानोना बिसोरनि लामायाव बाश्रा दानथे लायनाया जाबाय सोर देरसिन।

35जिसुआ जिरायनानै सा जिनै थोनहरजानाय फोरखौ गावनिआव लिनहरबाय। बियो बुंबाय, "जाया बयनिखुइबो गोनांसिन जानो हास्थायो बियो गावनिखुइ गुबुनखौ गोनांसिन खालामग्रोनांगोन। बिसोर गासैबो गुबुनफोरखौ सिबि नांगोन।"

36अब्ला जिसुआ उन्दै गथ'खौ लांबाय आरो सेलाफोरनि सिगांआव गथ'खौ फसंबाय। बियो गथ'नि आखायखौ हमनानै बुंबाय। 37"जायफोरा गथ'फोरखौ बेबायदि आंनि मुडाव नाजावदों आंखौनो नाजावदों। आरो जायफोरा आंखौ नाजावदों बिसोरो आंखौ थोनहरग्राखौबो नाजावदों।"

### जाया जॉनि बेरेखा नडा बियो जॉनि

38अब्ला जहना बुंबाय, "फोरोंगुरु, जों सासे मानसिखौ नुदों। जाया नॉनि मुंखौ बुंनानै बादुआ जिउफोरखौ मानसिफोरनिफ्राइ होखारदों। बियो जॉनि गेजेरजों नडा। अब्ला जों बिखौ होबथाबाय, मानोना बियो जॉनि हानजानि नडामोन।"

39जिसुआ बुंबाय, "बिखौ होबथानो नाडा। जायाफोरा आंनि मुंखौ गोहो गोनां खामानिफोर मावो बियो थाबैनो आंनि सोमोन्दै गाज्जि राव बुंनाय नडा। 40जायफोरा जॉनि बेरेखा नडा बिसोरोजों जों लोगोसे। 41आं नोंसोरखौ थारैनो बुंडो जाया नोंसोर मुसिह' नि होननानै हेफाजाब होनानै दै लोंनो होयो बिसोरो थारैनो बान्था मोनगोन।"

### जिसुआ फाप खालाम होनायनि सोमोन्दै सोंखारिनाय

42जुदि बे सासे उन्दै गथ'आ आंखौ फोथायोब्ला आरो सोरबाया बे गथ'खौ फाप खालाम होयोब्ला बियो बै मानसिनि थाखै जोबोर गाज्जि जागोन। बियो गोदोनायाव अन्थाइ खानानै लैथोआव गब'नायासो बिनि लागै गाहामसिन। 43जुदि नॉनि आखाया फाप खालाम होयोब्ला दानस'ना गार। नॉनि मोदोमनि बबेबा मोनसे बाहागोखौ खोमानानै जोबनो गोयै गोथांखौ मोननाया नॉनि थाखै साबसिन। फारनै आखाय थानानै नोरोगआव थांनायनिखुइ। बैयाव अरा माब्लाबाबो गोमोरनो रोडा। 44बै नोरोगनि

एमफौ जाया मानसिनि मोदोमखौ जायो बियो थैनो रोडा। बैयाव अराबो माब्लाबाबो गोमोरा। <sup>45</sup>जुदि नॉनि आथिंडा फाप खालाम होयोब्ला बिखौ दानस'ना गार। नॉनि मोदोमनि बबेबा मोनसे बाहागोखौ खोमानानै जोबनो गोयै गोथांखौ मोननाया नॉनि थाखै साबसिन, फारनै आथिं थानानै नोरोगआव गारहर जानायनिखुइ। <sup>46</sup>बै नोरोगनि एमफौ जाया मानसिनि मोदोमखौ जायो बियो थैनो रोडा। बैयाव अराबो माब्लाबाबो गोमोरा। <sup>47</sup>जुदि नॉनि मेगना फाप खालाम होयोब्ला एरख'नानै गारहर। नॉनि थाखै ईशोरनि रायजोआव थाइसेल' मेगनजों हाबनो मोननाया नॉनि थाखै मोजांसिन थाइनै मेगन थानानै नोरोगाव गारहर जानायनिखुइ। <sup>48</sup>बै नोरोगनि एमफौ जाया मानसिनि मोदोमखौ जायो बियो थैनो रोडा। बैयाव अराबो माब्लाबाबो गोमोरा।

<sup>49</sup>साफ्रोमबो संख्रिनि अरजों फोथार जागोन आरो मोनफ्रोमबो बुलिया संख्रिजों फोथार जागोन।

<sup>50</sup>“संख्रिआ मोजां। नाथाइ जेब्ला संख्रिनि बाबनाया गोमायो बिखौ नोडो मोजां खालामफिननो हाया। बिनिखायनो संख्रिनि मोजां गुनखौ खोमानो नाडा। आरो गोजोननायजों जों गावजों गाव थांनानै थानांगौ।”

### जिसुआ हौवा हिनजाव गारलायनायनि सोमोन्दै फोरोंनाय

**10** <sup>1</sup>जेब्ला जिसुआ बे जायगाखौ नागारनानै जरदन दैमा बारै जुदाह हादरनि जायगायाव थांडो। आरोबाव गोबां मानसि बिनियाव फैदों। आरो जिसुआ बिसोर खौ फोरोंदों जैरे बियो सानफ्रोमनोबो फोरोंडो।

<sup>2</sup>माखासे फारिसाइफोरा जिसुनिआव फैबाय आरो बिसोरो बिखौ माबा मोनसे गोरान्थि बंधोनो नाजादों। बिसोरो बिखौ सोंबाय, “बियो उसित ना, सासे मानसिआ गावनि हिनजावखौ गारनाया?”

<sup>3</sup>जिसुआ फिनबाय, “मुसिआ नोंसोरनो मा मावनो बिथोन होदों?”

<sup>4</sup>फारिसाइफ्रा बंधाय, “मुसिआ बिथोन होदोंदि सासे मानसिआ गावनि हिनजावखौ फोरमान बिलाय लिरना होनानै गारनो।”

<sup>5</sup>जिसुआ बंधाय, “मुसिआ बे बिथोनखौ नोंसोरनो लिरबाय मानोना नोंसोर ईशोरनि

फोरोंनायखौ नाजावनो गोसो जाया। <sup>6</sup>नाथाइ, ईशोरा जेब्ला संसारखौ सोरजियो। बियो मानसिखौ हौवा हिनजाव सोरजिबाय। <sup>7</sup>बिनिखायनो मानसिया गावनि बिमा आरो बिफाखौ नागारनानै बियो गावनि हिनजावजों ज'जायो। <sup>8</sup>आरो बिसोर सानै नंलिया नाथाइ सासे ल'सो। <sup>9</sup>ईशोरा बिसोरखौ ज' खालामबाय, बिनिखायनो रावबो बिसोरखौ जुदा दाखामथों।”

<sup>10</sup>उनाव, जेब्ला जिसु आरो सेलाफोरा न'सिडाव मोन बिसोरो बिखौ आरोबाव सोंबावबाय हौवा हिनजाव गारज्जलायनायनि सोमोन्दै। <sup>11</sup>बियो बुंबाय, “सोरबाफोर गावनि हिनजावखौ गारनानै गुबुन हिनजावखौ हाबा खालामोब्ला बियो गावनि हिनजावनि बेरेखा फाप मावो बियो जिनाहारि जायो। <sup>12</sup>आरो हिनजावआ गावनि हौवाखौ गारनानै गुबुन हौवाखौ हाबा खालामोब्ला बियो जिनाहारि खालामनाय जायो।”

### जिसुआ गथ'फोरखौ बरायनाय

<sup>13</sup>मानसिफोरा गावसोरनि उन्दै गथ'फोरखौ जिसुनिआव लाबोदों जेन बियो गावनि आखायजों बिसोरनि सायाव बोर होयो। नाथाइ सेलाफ्रा बिसोर मानसिफोरखौ गथ'फोरखौ बिनियाव लाबोनो बादो होदोंमोन। <sup>14</sup>जिसुआ नुबाय मा जादों। बियो गावनि सेलाफोरा गथ'फोरखौ फैनो होयिखौ मोजां मोनासै। अब्ला बियो बिसोरखौ बुंबाय, उन्दै गथ'फोरखौ आंनियाव फैनो हो। <sup>15</sup>सैथोआ बेनो, नोंसोरो ईशोरनि रायजोखौ नाजावगोन जैरे बे उन्दैफोरा मुवाखौ नाजाबो। नडाब्ला नोंसोर माब्लाबाबो बेयाव हाबनो मोननाइ नडा। <sup>16</sup>अब्ला जिसुआ गथ'फोरखौ गावनि आखायाव बामनानै लाबाय। बियो बिसोरनि खर'आव गावनि आखायखौ होनानै बोर होबाय।

### सासे धोनि मानसिआ जिसुनि उनाव फैनो नेउसिनाय

<sup>17</sup>जिसुआ थानो जागाइजेनबायमोन, नाथाइ सासे मानसिआ बिनिआव खारबोबाय आरो बियो बिनि सिगांआव हानथु खराय फैबाय। मानसिआ सोंबाय, “मोजां फोरोंगुरु, आं मा मावनांगौ जोबनो गोयै जिउखौ मोननो?”

18जिसुआ फिनबाय, “नों मानो आंखौ मोजां होननानै बुंखो?ईशोरा ल’सो मोजां।  
19आरो नों मिथिगौ बिनि बिथोन फोरखौ, नोडो रावखौबो दा बुथार, नोडो जिनाहारि  
मावनो नाडा, नोडो सिखाव खावनो नाडा, नोडो नंखाय बुंनाडा, नोडो थ’गाय नाडा,  
नोडो गावनि बिमा बिफाखौ मान हो....”

20मानसिआ बुंफिनबाय, “फोरोंगुरु आं बेफोर गासैबो आयेनफोरखौ उन्दैनफ्राइनो  
मानिबोदों।”

21जिसुआ मानसिनिथिं नायबाय बियो बिखौ बेसेबां अनो बेखौ दिन्थिनानै बियो  
बुंबाय, “बेयावहाय आरो मोनसे नों मावनो गोनां दंबावो। थां आरो नोंहा थानाय  
गासैखौबो फान है जोब। फाननानै मोननाय रांखौ जायफ्रा हावरिया बिसोरनो हो।  
अब्ला नोंहा सोरगोआव धोनि जागोन बिनि उनाव आंनि उन उन फै।”

22मानसिआ दुखु जाबाय जेब्ला जिसुआ बिनि गासै रांखौ हावरिया फोरनो होनो  
थोनबाय। बियो बेखौ मावनो गोसो जायासै, मानोना बियो जोबोर धोनिमोन। अब्ला  
बियो दुखु जानानै थांदों।

23अब्ला जिसुआ गावनि सेलाफोरखौ नायहरनानै बिसोरखौ बुंबाय, “धोनि  
मानसिआ ईशोरनि रायजोआव हाबनाया जोबोर गोब्राब।”

24सेलाफोरा सोमो नांबाय जिसुनि बुंनायखौ। नाथाइ बियो बुंफिनबाय, “आंनि  
गथ’फोर ईशोरनि रायजोआव हाबनाया जोबोर गोब्राब 25मासे उट गरायआ बिजि  
खोमाजों हाबलांनाया जोबोर गोरलै, सासे धोनि मानसिआ ईशोरनि रायजोआव  
हाबनायनिखुइ।”

26सेलाफोरा आरोबाव गोबां सोमो नांबावबाय आरो गावजों गाव बुंज्लायबाय,  
“आब्लालाय सोर बासायजागोन?”

27जिसुआ बिसोरखौ नायनानै बुंबाय, “बेखोल’नो मानसिया मावनो हाया नाथाइ  
ईशोरा हागौ। बियो गासैखौबो मावनो हायो।”

28पितरा जिसुखौ बुंबाय, “जों गासैखौबो नागारबाय नोंनि उन उन फैनो थाखै।”

29जिसुआ बुंबाय, “आं समाय लायोदि जायफ्रा गावनि न’फोर, बिदा-फंबाय, बिब’  
बिनानाव बिमा बिफा गथ’फोर एबा बारि बागान गासैखौबो आंनि थाखै आरो गाहाम

रादाबनि थाखै नागारदोंब्ला। <sup>30</sup>बिसोरो गावसोर गारबोनायनिखुइ जौसे गुन बारा मोनगोन। बे बहुमावनो बिसोरो गोबां न, बिदा-फंबाय, बिब' बिनानाव बिमा-बिफा गथ'फोर आरो बारि बागान मोनगोन। आरो बेफोरजों लोगोसे बिसोरो सैसोनायबो मोनगोन। नाथाइ फैगोन बहुमाव बिसोरो जोबनो गोयै जिउनि बान्थाखौ मोनगोन। <sup>31</sup>गोबां मानसिफोर जायफोरहा दायो गोजौ मासिआव दं बिसोरो इयुनआव गाहायसिन मासिखौसो मोनगोन। आरो जाय मानसिफोरा दायो गाहायसिन मासिआव दं बिसोरो गोजौसिन मासिखौ मोनगोन।”

### जिसुआ आरोबाब गावनि थैनायनि सोमोन्दै रायज्लायानाय

<sup>32</sup>जिसु आरो बिजों थांफानायफोरा जेरुसालेमाव थांबाय थानाय लामायाव। बियो हानजानि सिगां बाहागोआव दंमोन। बिनि सेलाफ्रा नायगिदिला बायदों मा जाखो होननानै आरो जाय मानसिफोरा बिनि उनाव थांदोंमोन बिसोरो गोसोआव गिनाय मोनदों। जिसुआ सा जिने थोनहरजानायफोरखौ आरोबाव ज'खालामबाय आरो बिसोर जौल' रायज्लाय बाय। बियो बिसोरनो खिनथा दों जेरुसालेमआव थांनानै मा जागोन। <sup>33</sup>बियो बुंबाय, “जों जेरुसालेमआव थांगासिनो दं। मानसिनि बिसा हौवाया गाहाय दौरि आरो आयेन फोरोंगुरु फोरनि आखायाव ग'थाइ जागोन। बिसोरो बुंगोन बियो थैथार नांगोन आरो गुबुनारिनि आखायाव बिखौ ग'थाइगोन। <sup>34</sup>जायफोरा बिखौ मिनिगोन आरो बिनिआव खुदै मुजुगोन। बिसोरो बिखौ साबुकजों बुगोन आरो बिखौ बुथारगोन। नाथाइ बियो सानथाम थैनायनि उनाव सिखां फिननानै गोथां जागोन।”

### जाकुब आरो जहना अननाय बिनाय

<sup>35</sup>अब्ला जेबेदायनि बिसाज्ला, जाकुब आरो जहना जिसुनियाव फैनानै बुंबाय, “फोरोंगुरु, नोडो जौनि थाखै माबा मोनसे मावनानै गालांदो।”

<sup>36</sup>जिसुआ सोंबाय, “नोंसोरनि थाखै आंखौ मा मावजानो लुबैयो?”

<sup>37</sup>बिसाज्लाफोरा फिनबाय, “जेब्ला राजा बादि नोंहा गेदेर मान थागोन बेखौ जौनोबो

होदो। जॉनि गेजेरनिफ्राइ सासेखौ नॉनि आगदा आरो गुबुन सासेखौ नॉनि आगसिथिं फज'दो।”

<sup>38</sup>जिसुआ बुंबाय, “नोंसोरो बुजियाखै नोंसोर मा बिदों। नोंसोरो लॉनो हागोनना जाय खुरिनिफ्राय आं लोंथार नांगौ। नोंसोर बाप्टिस्मा<sup>3</sup> लानो हागोना जाय बाप्टिस्मा नि गेजेरजों आं थानांगौ?”

<sup>39</sup>बिसाज्लाफ्रा फिनबाय, “नांगौ जों हागोन?”

जिसुआ बिसाज्लाफोरखौ बुंबाय, “बियो सैथो आं जि खुरैनिफ्राइ लोंगोन बेखौ नोंसोरबो लोंगोन। आरो नोंसोरबो बाप्टिस्मा लागोन जाय बाप्टिस्मानि गेजेरजों आं थानार नांगोन। <sup>40</sup>नाथाइ आं बुंनो हाया सोर आनि आगदा एबा आगसि जागोन। बै जायगाफोरनि थाखाय ईशोरा थाम-थिम खालामनानै सायख'खाबाय।”

<sup>41</sup>जेब्ला बिनि गुबुन साजि सेलाफ्रा बिखौ खोनबाय। बिसोरो जाकुब आरो जहनखौ राग जोंबाय। <sup>42</sup>जिसुआ गासै सेलाफोरखौ ज'लिनहरबाय। बियो बुंबाय, “जुदायारि नडै मानसिफोरनि गेजेराव मानसिफोर थायो बिखौ बिसोर सासनगिरिफोर होनना बुंडो। नोंसोर मिथिगौ बै सासनगिरिफोरा गावसोरनि गोहोखौ मानसिफोरनि सायाव दिन्थिनो मोजां मोनो। आरो बिसोरनि गोनां दैदेनगिरिफोरा गावसोरनि एकथियारखौ मानसिफोरनि सायाव बाहायनो मोजां मोनो।” <sup>43</sup>नाथाइ बेबादि नोंसोरनियाव जानो नाडा। नोंसोरनि गेजेराव सोरबा दैदेनगिरि जानोब्ला नोडो दाहोना जाग्रो नांगोन। <sup>44</sup>सोरबा सिगां जानो नागिरिदोंब्ला बियो गुबुनफोरखौ दाहोना बायदि जानानै दाव दाव खालामग्रो नांगोन। <sup>45</sup>आनि बिदिन्थिखौ ला: मानसिनि बिसाया मानसिफोरजों दाव दाव खालाम जानो फैयाखै। बियो गुबुनखौ दाव दाव खालामनोसो फैदों आरो गावनि जिउखौ होनानै गोबां मानसिखौ बासायनोसो फैदों।”

<sup>3</sup> **10:38 बाप्टिस्मा** सरासनसायै बिनि ग्रिक सोदोवनि बाहायथिया थब्ल'नाय एबा “फबजानाय” जेब्ला सासे मानसिया दैयाव दसे सम थायो अब्ला बियो बिनि जिउनि थिरांश्या लानानै सोलायनायखौ सोमोन्दो खालामो आरो ईशोरनियाव गिदिं फिननाय। आरो बिखौ फोथायनानै गावसोरनि फापरखौ खमा मोननो।



### जिसुआ सासे खाना मानसिखौ सोखानाय

46अब्ला बियो जेरिख' नोगोराव फैदों। जेब्ला जिसुआ गावनि सेलाफोरजों बै जायगाखौ नागारो, मोनसे गेदेर हानजाया बिजों दंमोन। सासे खाना मानसिनि मुडा बारतिमाय(ओथिआ तिमायनि बिसाज्ला) आ लामा जिंआव ज'नानै दंमोन। बियो सानफ्रोमबो रांफोर बिबाय दोंमोन। 47बियो खोना बायदि नासारेतनि जिसुआ बे लामार्जों थाबायदों होननानै। अब्ला बियो होखावबाय, “जिसु, दाबिदनि बिसाज्ला आंखौ सहाय खालामदो।”

48गोबां मानसिफ्रा खाना मानसिखौ सोंखारिदों आरो बिखौ सिरि थानो थिनदों। नाथाइ बियो बारानिफ्राइ बारसो होखावबाय, “दाबिदनि बिसाज्ला, आंखौ हेफाजाब खालामदो।” check para

49जिसुआ थाबथानानै बुंबाय, “बिखौ बेयाव फैनो हो अब्ला बिसोरो खाना मानसिखौ लिंहरबाय, “दायो नोडो गोजोनै। सिखारदो। जिसुआ नोंखौ लिंहरदों। 50खाना मानसिया गोंखैनो सिखारबाय। बियो गावनि बिसनाखौ नागारबाय आरो जिसुनि खाथिआव थांबाय।

51जिसुआ मानसिखौ सोंबाय, “आं नोंनि थाखाय मा मावनायखौ लुबैयो?”

बियो फिनबाय, “फोरोंगुरु, आं नुफिननो हासथायो।” 52जिसुआ बुंबाय, “थां! नोडो सोखाजाबाय मानोना नोडो फोथायबाय।” गोखैनो मानसिआ नुनो मोनबाय। बियो जिसुनि उन उन लामासिम थांफाबाय।

### जिसुआ राजाबादि जेरुसालेमाव हाबनाय

**11** 1जिसु आरो बिनि सेलाफोरा जेरुसालेमनि खाथिथाराव सफैबाय। बिसोरो बेथफागे आरो बेथानि नोगोरनि अलिब हाजोआव फैबाय। बैनिफ्राइ जिसुआ गावनि सानै सेलाफोरखौ माबा मोनसे मावनो थोनहरबाय। 2बियो बिसोर खौ बुंबाय, “नोगोराव थां नोंसोर बैयाव नुगोन। जेब्ला नोंसोर बैयाव हाबहैगोन, नोंसोर मासे गेम्बु गराय बिसा मोनगोन जायखौ रावबो गाखो फेराखै। बिखौ खेउनानै आंनिआव लाबो। 3जुदि सोरबा नोंसोरखौ सोंब्ला नोंसोरो मानो गेम्बु गरायखो लांदों होननानै, बिसोरखौ बुं, “फोरबुनो बिखौ नांगौ। बियो बेखौ थाबनो हरफिनगोन।”

4सेलाफोरा नोगोराव थांबाय। बिसोरो मासे गेम्बु गराय फिसाखौ न'नि दरजा मोखांआव खानानै दोननाय मोनहैबाय। आरो बिसोरो बिखौ खेउबाय। 5माखासे मानसिफोर बैयाव गसनानै दंमोन आरो बेखौ नुबाय। बिसोरो सोंबाय, नोंसोर मा मावदों?नोंसोरो मानो बे गेम्बु गरायखौ खेउदों?" 6सेलाफोरा फिनबाय, "जेरैबादि जिसुआ बिसोरखौ बुंदोंमोन, आरो मानसिफोरा गेम्बु गरायखौ लांनो होबाय।"

7सेलाफोरा गेम्बु गरायखौ जिसुनियाव लाबोबाय। बिसोरो गावसोरनि गस्लाफोरखौ बिनि सायाव होबाय। आरो जिसुआ बिनि सायाव ज'बाय। 8गोबां मानसिफोरा गावनि गस्लाफोरखौ जिसुनि थाखै बनानै दालायफोरखौ दानबाय आरो दालायफोरखौ लामायाव ब'नानै होबाय। 9माखासे आ जिसुनि सिगां सिगां थाबायदों। गुबुनफोरा बिनि उन उन थाबायदों। गासैबो बेबादि होखावदों,

“बिखौ,बाख्नायदो!”

‘बरायदो! ईशोरा बोर होथों जाया फोरबुनि मुडै फैदों।’ गितफोर 118:25-26

10 “जोंनि बिफा दाबिदनि रायजोखौ ईशोरा बोर होथों।

बै रायजोआ फैथों

सोरगोआवबो ईशोरा बाख्नाय जाथों।”

11जिसुआ जेरुसालेमआव हाबहैबाय आरो मन्दिराव थांबाय। बियो मन्दिराव गासैबो जायगा फोरखौ नायदिंबाय नाथाइ बे समा गोबाव जाबायमोन। बिनिखायनो बियो बेथानिआव सा जिनै थोनहरजानायफोरजों थांबाय।

### जिसुआ दुम्ब्रु बिफांनि थैनायखौ बुंनाय

12नखा नाथै, जिसुआ बेथानिनिफ्राइ फैफिनायाव। बियो उखेदोंमोन। 13बियो फांसे बिलायजों बुंफबनाय दुम्ब्रु बिफांखौ नुबाय। आब्ला बियो दुम्ब्रु बिफांनि खाथियाव थांबाय दुम्ब्रु फिथायफोर थायदों साननानै नायनो थांबाय। नाथाइ बियो बिफांआव

थायसेबो दुम्ब्रु फिथाय मोननो हायासै। बैयाव हाय बिलाय ल' दंमोन, मानोना बे समा दुम्ब्रु फिथाइ थायनायनि सम नडामोन। <sup>14</sup>बिनिखायनो जिसुआ बिफांखौ बुंबाय, “मानसिफोरा आरो नॉनिफ्राइ फिथाय जाबावलिया।” बिनि सेलाफोरा बिखौ बे बायदि बुंनाय खोनाबाय।

### जिसुआ मन्दिराव थांनाय

<sup>15</sup>जिसुआ जेरुसालेमआव थांबाय आरो मन्दिराव हाबबाय। बियो मानसिफोरखौ बाहेराव हुवनहरदों जायफोरा बेयाव मुवाफोर बायदों आरो फानदों। बियो रां सोलायग्राफोरनि आरांगाफोरखौ उलथायना होदों। आरो बियो फारेउ फानग्राफोरनि ज'ग्राफोरखौ उलथाय ना होदों। <sup>16</sup>बियो रावखौबो बे मन्दिरनि जायगाथिं जेबो मुवाफोर लांनो होयाखैमोन। <sup>17</sup>अब्ला जिसुआ मानसिफोरखौ फोरोंनानै बुंबाय, “सास्थोराव लिरनाय दं, आंनि मन्दिरा गासै हारिजों आरज खालामाग्रा न' मुंखजागोन। नाथाइ नोंसोरो बेखौ सोलायनानै दाखुफोरनि थाखोमाग्रा जायगासो बनायदों।”

<sup>18</sup>जेब्ला गाहाय दौरि आरो आयेन फोरोंगुरु फोरा जिसुनि बेबादि बुंनायखौ खोनादों बिसोरो बिखौ बुथारनो थाखै लामा नागिरदों। बिसोरो बिखौ गिनायबो मोनदों मानोना, गासै मानसिफोरा बिनि फोरोंनायखौ सोमो नाडोमोन। <sup>19</sup>बे हराव जिसु आरो बिनि सेलाफोरा नोगोरखौ नागारनानै थांबाय।

### जिसुआ फोथायनायनि गोहोखौ दिन्थिनाय

<sup>20</sup>नखा नायै फुंडाव जिसुआ गावनि सेलाफोरजों थाबायबाय थादोंमोन। बिसोरो दुम्ब्रु बिफांखौ नुबाय जायखौ बियो सानसेनि सिगां बुंदोंमोन। बिफांडा राननानै थैबाय, रोदायबो थैबावबाय <sup>21</sup>पितरा बिफांखौ गोसो खानानै जिसुखौ बुंबाय, “फोरोंगुरु, नाय!मैया, नों बे दुम्ब्रु बिफांखौ थैनो बुंबाय दायो बियो रानानै थैबाय!”

<sup>22</sup>जिसुआ फिनबाय, “ईशोरनियाव फोथाय। <sup>23</sup>सैथोआ बेनो नों बे हाजोखौ बुंडोब्ला, हाजो थांनानै सागोराव गोग्लै है। आरो नॉनि गोसोआव जेबो गोनो गोथो

गैयाब्ला आरो नों मा बुंदों जागोन होननानै फोथायोब्ला ईशोरा नोंनि थाखै मावगोन।”  
 24बिनिखायनो आं नोंसोरखौ बुंडो नोंसोर आरजआव बि मा नांगौ। आरो जुदि नोंडो  
 फोथायो नोंडो बेफोरखौ मोनबाय होननानै अब्ला बेफोरो नोंनि जागोन। 25जेब्ला नों  
 आरज खालामो आरो नों गोसो खांबाय जे नोडो सोरखौबा रागा जानानै दं, मानिबा  
 थाखै, अब्ला बै मानसिखौ खमा हो। बिसोरखौ खमा हो, अब्लानो नोंनि सोरगोनि  
 बिफायाबो नोंनि फापखौ खमा होगोन। 26नाथाइ नों जुदि गुबुनखौ खमा होआ अब्ला  
 नोंनि सोरगोनि बिफायाबो नोंनि फापखौ खमा होनाय नडा।”

### जुदायारिफोरनि दैदेनगिरिफोरा

#### जिसुनि एकथियारखौ गोनो गोथो खालामनाय

27जिसु आरो बिनि सेलाफोरा आरोबाव जेरुसालेमआव थांफिनबाय। जिसुआ मन्दिरनि  
 लांगोनायाव थाबाय दोंमोन। गाहाय दौरिफोर, आयेन फोरोंगुरुफोर, आरो जुदायारि  
 गागिफोर बिनियाव फैदों। 28बिसोरो बुंबाय, जोंनो बुंनयासाय! नोडो सोरनि एकथियार  
 जों बेफोर खामानिखौ मावदों! सोर नोंनो बे एकथियारखौ होदों?”

29जिसुआ फिनबाय, “आं नोंसोरखौ मोनसे सोंनो, नोंसोर आंनि सोंनायखौ फिन  
 हो। अब्ला आं सोरनि एकथियारजों बे खामानिफोरखौ मावदों। 30आंनो खिन्थासाय:  
 जेब्ला जहनआ मानसिफोरखौ बाप्टिस्मा होदों, बिनि एकथियारा ईशोरनिफ्राइ फैदोंमोन  
 ना मानसिफोरनिफ्राइ फैदोंमोन? आंनो फिनहो।”

31बिसोर जिहुदि दैदेनगिरिफोरा जिसुनि सोंनायखौ रायज्जलायबाय बिसोरो गावजों  
 गाव बुंज्जलायदों “जों जुदि फिननाय होयो, जहननि बाप्टिस्माआ ईशोरनिफ्राइ, अब्ला  
 बियो बुंगोन अब्ला नोंसोरो जहनखौ मानो फोथायाखै? 32नाथाइ जों बुंनो हाया जहननि  
 बाप्टिस्माया सोरनिफ्रायबा!” (बिसोर दैदेनगिरि फोरहा मानसिफोरखौ गिनाय दं,  
 मानोना मानसिफोरा जहनखौ नाबि होनना फोथायोमोन)।

33बिनिखायनो दैदेनगिरिफोरा जिसुनियाव फिनबाय, “जों फिननायखौ मिथिया।”

जिसुआ बुंबाय, “अब्ला आंबो नोंसोरनो खिन्थाया सोर आंनो बे एकथियारखौ  
 बेफोर खामानिखौ मावनो होदों।”

## ईशोरा गावनि बिसाज्लाखौ थोनहरनाय

**12** <sup>1</sup>जिसुआ सल'फोर बाहायो मानसिफोरखौ फोरोंनो थाखै। बियो बुंबाय, “सासे मानसिया दरसे द्राखा बागान बानायबाय। बियो बागाननि सोरगिदि बारि दुंबाय आरो द्राखा फिथायखौ फेरेतनो मोनसे हाखर जावबाय। अब्ला बियो गंसे नेग्रा खाम्फा लुबाय। बियो बे बागानखौ गुबुन आबादारिफोरनो होथ'नानै दावबायनो ओंखार लांबाय।”

<sup>2</sup>उनाव, द्राखाखौ खानायनि सम जाबायमोन। अब्ला बि मानसिआ दाहोनाखौ बै आबादारिफोरनिआव गावनि द्राखानि बाहागोखौ लायनो थोनहरदों। <sup>3</sup>नाथाइ आबादारिफोरा दाहोनाखौ हमनानै बुना हरबाय। बिसोरो जेबो हरा लालिनो थोनहरबाय। <sup>4</sup>अब्ला बि मानसिया आरो गुबुन सासे दाहोनाखौ आबादारिफोरनिआव थोनहरबावबाय। बिसोरो बि दाहोनाखौबो खर'आव बुबाय, बिनो जेबो मान होआसै। <sup>5</sup>नाथाइ मानसिया आरोबाव गुबुन दाहोनाखौ थोनहरबाय। आबादारिफोरा बे दाहोनाखौ बुथारबाय मानसिया गोबां दाहोनाफोरखौ बे आबादारिफोरनिसिम थोनहरबाय। आबादारिफोरा माखासेखौ बुबाय आरो गुबुन फोरखौ बुथारबाय।

<sup>6</sup>बि मानसिहा आरो सासेल' मानसि थाबावबाय बै आबादारिफोरनिसिम थोनहरनो। बियो जाबाय गावनि बिसाज्ला। बियो गावनि बिसाज्लाखौ जोबोर अ'नो नाथाइ बियो थिरांथा लाबाय बिखौ हरनो। बियो बुंबाय, “आबादारिफोरा आंनि बिसाज्लाखौ मान होगोन।”

<sup>7</sup>“नाथाइ आबादारिफोरा गावजों गाव बुंज्जलायबाय, ‘बियो बिगोमानि बिसाज्ला आरो बे द्राखा बागाना बिनिसो जागोन। जुदि जों बिखौ बुथारोब्ला, बियो जोंनि बागान जागोन।’ <sup>8</sup>बिनिखायनो बिसोरो बिसाज्लाखौ लानानै बिखौ बागाननि बाहेराव गारहैबाय आरो बिखौ बुथारबाय।”

<sup>9</sup>“अब्ला जाय मानसिआ बागाननि बिगोमा बियो मा खालामगोन? बियो थानानै बैसोर आबादारिफोरखौ बुथारगोन आरो बियो गुबुनफोरनो आरोबाव बे हाखौ हैगोन। <sup>10</sup>थारैनो नोंसोरो बिनि सोमोन्दै सास्थोराव फरायबाय:

जाय अन्थायखौ न' बानायग्राया नाजावनो नेउसिदोंमोन बियो ख'नानि  
गाहाय अन्थाय जाबाय।

<sup>11</sup> ईशोरा बिखौ मावबाय,

आरो बियो जॉनि थाखै सोमो नांथाव।”

गितफोर 118:22-23

<sup>12</sup>जेब्ला जुदायारिनि दैदेनगिरिफ्रा बे सल'खौ खोनायो बिसोरो मिथिगौ बेफोर गासैबो गावसोरनि सोमोन्दै। बिसोरो जिसुखौ हमनो सुलु नागेरदोंमोन। नाथाय बिसोरो गिदोंमोन हानजाफोरा माबाफोर खालामनो हागौ होनना। अब्ला बिसोरो बिखौ (जिसुखौ) नागारनानै ओंखारलांबाय।

### जुदायारिनि दैदेनगिरिफोरा जिसुखौ सुलु नागिरनाय

<sup>13</sup>उनाव जुदायारिनि दैदेनगिरिफोरा, माखासे फारिसाइफोर आरो हेरदनि हानजानिफ्राइ माखासे मानसि जिसुनिसिम थोनहरबाय। बिसोरो जिसुखौ माबा मोनसे गोरोन्थि बंडोब्ला हमनो हानाय बादि। <sup>14</sup>बिसोरो जिसुनिआव थानानै बुंबाय, “फोरोंगुरु, जों मिथिगौ नोडो सासे गियानि मानसि। गुबुना नॉनि सोमोन्दै मा सानो, नॉडो बेखौ गिया गासै मानसिफ्रा नॉनि थाखै स'मान। आरो नॉडो ईशोरनि सैथो लामानि सोमोन्दै फोरोंडो। जॉनो खिन्था नायसाय, खैसरनो खाजोना होनया हामगौ ना हामा? जॉडो बिसोरनो खाजोना होनां गौना होनाडा?”

<sup>15</sup>नाथाइ जिसुआ मिथिगौ बिसोर मानसिफोरा थारैनो गावखौ सुलु नायगासिनो दं। बियो बुंबाय, “ नोंसोरो मानो आंखौ गोरोन्थि बुंनायखौ हमनो थाखै सुलु नागिरबाय थार्दों? आंनो रुफा थाइसे रां लाबोलाय। आं बिखौ नायनो।” <sup>16</sup>बिसोरो जिसुनो थाइसे रां होबाय आरो बियो सोंबाय, “सोरनि मुसुखाया बेयाव दं? आरो सोरनि मुं बेयाव लिरनाय दं ?बिसोरो फिनबाय, “बियो खैसरनि मुसुखा आरो खैसरनि मुं।”

<sup>17</sup>अब्ला जिसुआ बिसोरखौ बुंबाय, “जाया खैसरनि बेखौ खैसरनो हो, आरो जाया ईशोरनि बेखौ ईशोरनि हो।” मानसिफोरा सोमो नांबाय जिसुआ मा बुंखो।

### माखासे सादुखाइफोरा जिसुखौ सुलु नागिरनाय

<sup>18</sup>अब्ला माखासे सादुखाइफोरा जिसुनिआव फेदों। (सादुखाइफोरा फोथायोदि रावबो

थैनायनिफ्राइ सिखां फिननाय नडा) बिसोरो मोनसे सॉलु सॉबाय: <sup>19</sup>फोरोंगुरु, मुसिया बेबायदि लिरदोंदि जुदि हाबा जानाय सासे मानसिया गथ'फोर गैया लासिनो थैयोब्ला बिन फंबाया बि हिनजाव खौ हाबा खालाम नांगौ। अब्ला बिसोरहा थैनाय बिदानि गथ'फोर थागोन। <sup>20</sup>बिसोरहा स्नि बिदा फंबाय दंमोन। सेथि बिदाया हाबा खालामबाय नाथाइ थैबाय। बिहा रावबो गथ'फोर गैयामोन <sup>21</sup>अब्ला नैथि फंबायआ हिनजावखौ हाबा खालामबाय। नाथाइ बिबो गथ' गैया लासिनो थैबाय। थामथि फंबाय जोंबो बे एखे जाथायानो जाबाय। <sup>22</sup>गासैबो स्नि बिदा फंबायफोरा बे हिनजावखौ हाबा खालामनानै थैजोबबाय। सासेबो बिदा-फंबाय फोरा बि हिनजावजों गथ' मोननो हायासै। आरो बि हिनजावआ जोबथायाव थैबाय। <sup>23</sup>नाथाइ गासैबो स्नि बिदा फंबायफोरा बिखौ हाबा खालामबाय। जेब्ला मानसिफोर थैनायनिफ्राइ सिखां फिनगोन अब्ला बे हिनजावआ सोरनि बिसि जागोन?

<sup>24</sup>जिसुआ फिनबाय, “नोंसोर माबोरै एसेबां गोरोन्थि जाखो? बियो जानो हागौ नोंसोर मिथिया ईशोरनि गोहोनि सोमोन्दै। <sup>25</sup>जेब्ला मानसिफोरा थैनानै सिखांफिनगोन, बेयावहाय जेबो हाबा जानाय गैया। मानसिफोरा गावजों गाव हाबा जाज्लायला गासैबो मानसिफोरा सोरगोनि आरफ' बायदिसो जागोन। <sup>26</sup>थारैनो नोंसोर फराबाय, ईशोरा मा बुंदों मानसिफोरा थैनानै थांखाफिननायनि सोमोन्दै। जाय बिजाबआव मुसिया बिफां गायज्राब आव अर जोंनायनि बाश्रा लिरदों बैयाव बुंदों ईशोरा मुसिनो बेबादि खिन्थादों: आडो आब्राहमनि ईशोर, इसाहाकनि ईशोर, आरो जाकुबनि बो ईशोर। <sup>27</sup>अब्ला बिसोरो दाबो थैयाखै मानोना बियो गोथां मानसिफोरनि ल' ईशोर। नोंसोर सादुखाइफोरा एसेबां गोरोन्थि!”

### बबे मोनसे बिथोनआ गोनांथारसिन

<sup>28</sup>सासे आयेन फोरोंगुरुआ जिसुनिआव फैबाय, बियो जिसुखौ सादुखाइ आरो फारिसाइफोरजों बाश्रा दानथे लायनायखौ खोनादों। बियो नुबाय जिसुआ बिसोरनि सोंनायखौ मौजांडै फिननाय होनायखौ। बिनिखायनो बियो सोंबाय, “बबे मानसे बिथोना गोनांथारसिन?”

<sup>29</sup>जिसुआ फिनबाय, “बयनिखुइबो गोनांसिन बिथोना जाबाय, ईसायेलनि मानसिफोर खोनासं! जॉनि फोरबो ईशोरा ल’नो फोरबो।” <sup>30</sup>नॉनि फोरबो ईशोरखौ गासै गोर्बो, गासै जिउ, गासै गोसो आरो गासै बोलोजॉ अन। <sup>31</sup>नैथि गोनांथार बिथोना जाबाय: नॉडो गावनि नुसुंसेखौ गावखौ बादि अन। बे मोननै बिथोनानो बयनिखुइबो गोनांसिनथार।

<sup>32</sup>मानसिया फिनबाय, “बियो जोबोर मोजां फिननाइ फोरोंगुरु। नोडो बुंनाया सैथो, ईशोरा ल’सो फोरबो आरो बैयाव रावबो गुबुन ईशोर गैबावलिया।” <sup>33</sup>आरो नॉडो ईशोरखौ नॉनि गासै गोर्बो, गासै जिउ, गासै गोसो आरो गासै बोलोजॉ अन। आरो नोडो गुबुनखौ गावखौ जैर अनो बेबादिनो अननांगौ। बेफोर बिथोनफोरा जोबोर गोनांथार जॉ ईशोरनो बावनाय गासै जुनार आरो बोलिनिखुइ।”

<sup>34</sup>जिसुआ नुबायदि बे मानसिआ जोबोर गियानिथै फिननाय होबाय। अब्ला बियो बिखौ बुंबाय नोडो ईशोरनि रायजोनि खाथि जाबाय। आरो बिनि उनाव बैयावहाय रावबो गोहो गोनां गैबावलिया जिसुनियाव सॉलुफोर सॉनो।

### मसिह’आ दाबिदनि बिसाज्ला ना दाबिदनि फोरबु

<sup>35</sup>जिसुआ मन्दिरनि जायगायाव फोरोंबाय थादोंमोन। बियो सॉबाय आयेन फोरोंगुरुफोरा मानो बुडो मसिह’आ दाबिदनि बिसाज्ला होननानै? <sup>36</sup>गोथार जिउनि हेफाजाबजॉ दाबिदआ गावनो बुंदों फोरबो ईशोरा आंनि फोरबुखौ बुंदों:

आंनि आगदा फारसे ज’दो आरो आंडो

नॉनि सथुरफोरखौ नॉनि सासननि सिडाव दोनगोन।

गित 110:1

<sup>37</sup>दाबिदआ गावनो मसिह’खौ फोरबु होननानै गाबज्जिदों अब्लालाय मसिह’आ माब्रै दाबिदनि बिसाज्ला जाखो? गोबां मानसिफोरा जिसुखौ खॉनासंनानै गोजोननाय मोनदों।

### जिसुआ आयेन फोरोंगुरुफोरखौ सॉंखारिनाय

<sup>38</sup>जिसुआ फोरोंबाय थानायाव बुंदों, “आयेन फोरोंगुरुफोरनिफ्राइ साबोधान जादो।



बिसोरो रौ रौ नुनाय हिफोर गाननानै थाबायबायनो मोंजा मोनो। आरो बिसोर गावसोरखौ हाथायफोराव मान होजानो मोजां मोनो। <sup>39</sup>बिसोरो खुलुमग्रा जायगाफोराव गोनां मासिआव ज'नो मोजां मोनो आरो हाबाफोराव मान होजानो लुबैयो। <sup>40</sup>नाथाइ बिसोरो रान्दिफोरखौ थागायनानै न'फोरखौ सेनानै लायो। अब्ला बिसोर गोलाव आरजफोर गाबनानै गावसोरखौ मोजां दिन्थिनो नागिरो। ईशोरा बिसोरखौ थारैनो साजा होथारगोन।”

### थार होनाय

<sup>41</sup>जिसुआ मन्दिरनि दान नाजावग्रा बाक्सु सेराव ज'दों आरो मानसिफोरा सोनाय फैसाफोरखौ नायबाय थादोंमोन। गोबां माहाजोन मानसिफोरा फैसाफोरखौ सोलांदोंमोन। <sup>42</sup>अब्ला सासे गोरिब हिनजाव फैबाय आरो फैसा गरनै सोनानै होबाय, जायनि बेसेना थाइसे निखुइ एसेसिन।

<sup>43</sup>जिसुआ गावनि सेलाफोरखौ गावनिआव लिनहरबाय आरो बुंबाय, “बे गोरिब रान्दिआ गरनै फिसा फैसा खौ होबाय, नाथाइ सैथोआ बेनो गासै माहाजोन मानसिफोरनिखुइ बांसिन होबाय। <sup>44</sup>बिसोरहा गोबां दं आरो बिसोरो होबाय जायखौ बिसोरनो नाडा। बि हिनजावआ जोबोर गोरिब, नाथाइ बियो गावनिआव गावनियाव थानाय गासैखौबो होबाय जाय फैसाखौ बिनो थांना थानो थाखै नांगौमोन।”

### जिसुआ इयुननि सोमोन्दै साबोधान होनाय

**13** <sup>1</sup>जिसुआ मन्दिरनि जायगानिफ्राय ओंखारलानोसैयाव। बिनिसासे सेलाया बिखौ बुंबाय, “फोरोंगुरु नायदो बे अन्थायफोरा बेसेबां गेदेर। एसे समायाना न'फोरा!”

<sup>2</sup>जिसुआ बुंफिनबाय, “नोडो बे गेदेर न'फोरखौ नुदोंना?बेफोर गासैबो संहार खालाम जाजोबगोन। थरफ्रोमबो अन्थायआ हायाव नारख्लाय जागोन। थाइसेबो अन्थाया थाइसेनि सायाव थानाय नडा।”

<sup>3</sup>बिनि उनाव,जिसुआ अलिप होजोनि सायाव जहैबाय। बियो पितर, जाकुब, जहन आरो आनद्रियासजों हारसिं दंमोन। बिसोरो गासैबो मन्दिरखौ नुदोंमोन, आरो बिसोरो

जिसुखौ बुंबाय, 4“जोनो खोथादो बैफोर माब्ला जागोन. आरो माया जॉनो दिन्थिगोन बैफोर समा जाबाय होननानै?”

5जिसुआ बिसोरनो बुंफिनबाय, “साबोधान जादो रावबो नॉसोरखौ सोलैनो हायै बादि।” 6गोबां मानसिफोर फैगोन आरो आंनि मुंखौ बाहायगोन। बिसोरो बुंगोन, आंनो मसिह'आ, आरो बिसोरो गोबां मानसिफोरखौ सोलैगोन। 7नॉसोरो दावहा नाज्लायानाय फोर खोनागोन। आरो नॉसोरो गुबुन दावहाफोर जागाइनाय सल'फोर खोनागोन। नाथाइ गिनो नाडा। बैफोर जाथारनांगोन जोबनाया फैनायनि सिगां। 8हादोरफोरा गुबुन मोनसे हादोरनि बैरेखा गसंगोन। रायजोफोरा गुबुन मोनसे रायजोफोरनि बैरेखा गसंगोन। बै समफोरा फैगोन जेराव मानसिफोरहा जानो थाखै ओंखाम फोर थानाय नडा आरो गोबां गुबुन गुबुन जायफोराव बांग्रि मावनाय जागोन। बैफोर दुखु जागोननि जागायजेन्नाय सो, जैरै हिनजावफोरहा गथ' सारिनायव साजेननाय बादिसो।

9“नॉसोरो साबोधान जादों! बैयावहाय माखासे मानसिफोर दं जायफोरा नॉसोरखौ हमगोन आरो नॉसोरखौ आंनि सेला जानायनि थाखै बिसार खालामगोन। बिसोरो गावसोरनि खुलुमग्रा न'आव नॉसोरखौ बुंगोन। नॉसोरो राजाफोर, आरो हादारगिरि फोरनि सिगांडाव गसं नांगोन। नॉसोरो आंनि सोमोन्दै खिन्था नांगोन। 10जोबनाया फैनायनि सिगां, गाहम रादाबा गासै हादोरफोराव खिन्था है जोब जानांगोन 11जेब्ला नॉसोर हमजानानै बिसार खालाम जायो। जों मा बुंगोन होननानै जिंगा दासि। बै समाव ईशोरा नॉसोरनो मा बुंनो होगोन बेखौसो बुं। बियो थारैनो नों बुंनाय जानाइ नडा। बियो गोथार जिउनिसो बुंनाय।

12“बिदाफोरा गावनि फंबायनि बैरेखा गसं गोन। आरो बिसोरखौ बुथार होजानो गथाइगोन। बिदाफोरा गावनि गथ'फोरखौ बुथार होजानो गथाइगोन। गथ'फोरा गावनि बिमा-बिफानि बैरेखा गसंगोन आरो बुथार होगोन। 13गासैबो मानसिफोरा नॉसोरखौ नायनो बागोन मानोना नॉसोरो आंनि सेलाफोर जानायखाय। नाथाय जायफोरा जोबथासिम फोथायनानै थागोन बिसोरो बासायजागोन।

14“नॉसोरो नुगोन, जोबोर गात्रिखौ जाया संहार खालामगोन। नॉसोरो बेफार मुवाखौ नुगोन जेराव बैफोर मुवाफोरा थानो नाडामोन।”(फरायग्राफोर, आं फोथायो नॉसोरो

बिनि ओथिखौ बुजिदों) “जुदा हादोराव थानाय साफ्रोमबो बै समाव हाजो फोराव खारलांगोन।”<sup>15</sup>बिसोरो खारलांगोन समा जेबो मुवानि थाखै आद्रि खालामा जासेनो। जुदि सोरबाया गावनि न’नि उखुमाव दंब्ला बिसोरो गाहायाव फैनानै न’सिनिफ्राइ मुवाफोर लायनो थानो नाडा।<sup>16</sup>जुदि सोरबा फोथाराव दंब्ला, बिसोरो गावनि गस्लाखौ लायनो थांफिननो नाडा।

<sup>17</sup>“बै समफोराव गोर्बोआव थानाय हिनजावफोर एबा जायफोरहा गथ’गोरलै दं बिसोरहा जोबोर सैसोनाय जागोन।<sup>18</sup>आरज खालाम बेफोर जेन गोजां बोथोर फोराव जाया।<sup>19</sup>मानोना बैफोर सानफोरा जोबोर सैसोनाय( बै समफोराव जोबोर सैसोनाय जागोन जेराव ईशोरा संसार सोरजिनायनिफ्राइ जाफेराखै)।आरो बेबादि गाज्जि जाथाय माब्लाबाबो जाफिन्नाय नडा।<sup>20</sup>नाथाइ फोरबुआ बै सैसोनाय समखौ गुसुं खालामनो थांखि लाबाय। जुदि बै समखौ गुसुं खालामाब्ला रावबो थानानै थानो हानाय नडामोन। नाथाइ फोरबुआ बै समखौ गुसुं खालामगोन गावनि गोनां सायख’ जानायफोरखौ सहाय खालामनो थाखै।

<sup>21</sup>“सोरबाफोर नोंखौ बै समाव बुंनो हागौ, नाय, मसिह’आ बेयाव हाय।” एबा गुबुन सासे मानसिआ बुंनो हागौ नै बियो बेयावनो। नाथाइ नोंसोरो बेखौ दाफोथाय।<sup>22</sup>नंखाय मसिह’ आरो नंखाय नाबिफोर फैगोन आरो सोमो नाथाव थाव हाबाफोर मावगोन,बिसोरो हानाय मानि ईशोरनि सायख’नाय मानसिफोरखौ मुख्र खालामनो नाजागोन।<sup>23</sup>बिनिखायनो साबोधान। दायो आं नोंसोरनो साबोधान खालामखाबाय बेफोर जायैनि सिगांआवनो।

### जेब्ला मानसिनि बिसा जिमुआ फैफिननगोन

<sup>24</sup>बै सैनांनाय समफोरा जाबाय थानाय समफोराव,

‘सानआबो खोमसि जागोन,

आरो नखाफोराबो सां होनाय नडा।’

<sup>25</sup> हाथरखिफोरा आखांनिफ्राइ गोग्लैगोन

आरो अखांडाव थानाय गासैबो सोलायगोन।’

26“अब्ला मानसिफोरा जोमैयाव मानसिनि बिसा हौवाखौ नुगोन।” 27बियो गावनि आरफ’फोरखौ बहुमनि सोरगिदि थोनहरगोन। बिसोरो बिनि सायख’ जानाय मानसिफोरखौ बहुमनि गासैबो ख’नानिफ्राइ बुथुमगोन।

28दुमब्रु बिफांआ जॉनो फोरोंडो। जेब्ला बिनि दालायफोरा गोथां आरो गुरै आरो गोरलै बिलायफोर रोदोमो, अब्ला नों मिथियो गोलोम बोथोरा जोबोर खाथि जाबाय। 29बेबादिनो जेब्ला नोंसोर बेफोर जानायखौ नुगोन, नोंसोर मिथिगोन समा<sup>4</sup> खाथिजाबाय, सफैथारसिगोन। 30आं नंथारगौयै नोंसोरखौ बंडोदि,बे फिरिनि मानसिफ्रा थांना थानायावनो बेफोर गासैबो जागोन। 31गासै नखां आरो बहुमआ संहार जाजोबगोन। नाथाइ आंनि बाथ्राया अरायबो थांनानै थागोन।

32“रावबो बै सम एबा सानखौ मिथिया। मानसिनि बिसा हौवा आरो सोरगोनि आरफ’आबो मिथिया। बै सान एबा समा माब्ला जागोन। बिफायाल’ मिथिगौ। 33साबोधान जा!अरायसम थामथिम जानानै था। नोंसोर मिथिया बै समा माब्ला।

34“बै समा सासे मानसिया गावनि न’खौ दाहोनाफोरनो ग’थायनानै थाबायनो थांनाय सासे मानसि बादि। बियो साफ्रोमनोबो मोनसे गोनां खामनिखौ मावनो थोनलां दों। बियो दर नेग्रा दाहोनाखौ अरायबो थामथिम जानानै थानो थोनदों। आरो दायो आं नोंसोरनि बैखौनो बुंदों। 35नोंसोरौ अरायबो थाम थिम जानानै था। नोंसोर मिथिया न’नि बिगोमाया माब्ला फैफिनगोन। बियो बेलासेआव, एबा हर गेजेराव एबा नखा नायसि नायसि एबा सान ओंखारनायाव सफैनो हागौ।” 36जुदि नोंसोरो अरायबो थाम थिम जानानै थायो। बियो उन्दुलांनायाव मोनफैनाय नडा। जुदिय’ बियो नोंसोर लामा नायनि सिगां सफैयो। 37आं नोंसोरनो जेखौ होनबाय आडो गासैखौबो बुंडो: सिरि मोननानै था।”

<sup>4</sup> 13:29 समा जिसुआ जेब्ला समनि सोमोन्दै रायज्जलाय दोंमोन अब्ला माबा मोनसे जागोननि गोनांथिखौ बुंदोंमोन।( नाय: लुक 21-31, जेराव जिसुआ बुंदो, ईशोरनि रायजो फैनायनि समा बेनो।

जुदायारि दैदेनगिरिफोरा जिसुखौ बुथारनो थांखि नागिरनाय

**14** <sup>1</sup>फसका फरब<sup>5</sup> आरो एमाव गोयै फिथानि फरबनि साननैन सिगां। गाहाय दौरिफोर आरो आयेन फोरोंगुरुफोरा मानसिफ्रा नुयैबादि जिसुखौ बुथारनो हानाय बायदि। <sup>2</sup>बिसोरो बुंबाय, “नाथाइ जों फरबनि समाव जिसुखौ हमनो हानाय नडा। जों लुबैयादि बे फरबनि समाव मानसिफ्रा रागा जानानै जेंना खालाम नायखौ।”

**सासे हिनजावआ गोनांथार मावनाय**

<sup>3</sup>जिसुआ बैथानियाव खुरिया र'ग जाजानाय सिमन नि न'आव दंमोन।जेब्ला बियो बैयाव जाबाय थारदोंमोन, सासे हिनजाव बिनियाव फैबाय। बिहा दामगोसा नारदुस गुबै थावजों बुंफबनाय मोनसे आलाबास्तार अन्थायनि थिंखिल दंमोन। बियो थिंखिलखौ खेवनानै मोदोमनाय थावखौ जिसुनि खर'आव लुनानै होबाय।

<sup>4</sup>माखासे सेलाफोरा बेबादि खालामनायखौ नुनानै। बिसोरो दुखु मोननानै गावजों गाव होनज्लायदों। बिसोरो बुंबाय, “मानो बे मोदोमनाय थावखौ आद्रि खालामखो?” <sup>5</sup>बिनि बेसेना बोसोरसे मावनायनि समान। बिखौ फाननानै रांखौ जायफोरा हावरिया बिसोरनो होनो हागौमोन आरो बिसोरो हिनजावखौ बुंदों नोडो जोबोर गाज्रिखौ मावबाय।

<sup>6</sup>जिसुआ बुंबाय, “बिखौ हारसिं थानो हो। नोंसोरो मानो बिखौ दुखु होदों?बियो बयनिखुइबो मोजांसिनखौ आंनि थाखै मावदों।” <sup>7</sup>नोंसोरजों लोगोसे हावरियाफोरा अरायबो दड आरो नोंसोरो बिसोरखौ जेब्लानो गोसो जायो अब्लानो हेफाजाब होनो हायो। नाथाय नोंसोरो आंखौ अरायसमनि थाखै मोननो हाया। <sup>8</sup>बे हिनजावआ जेखौ मावनो हायो बिखौल' आंनि थाखै मावबाय। बियो आंनि मोदोमाव मोदोमनाय थावखौ लुनानै आंनि थैनायनि सिगां थाम थिम खालामबाय। <sup>9</sup>बे गाहाम रादाबआ गासै बुहुमनि मानसिफोरनि गेजेराव खिन्था जागोन। आरो आं नंथारगौयै नोंसोरनो बुडो जेब्लानो

<sup>5</sup> 14:1 फसका फरब मोनसे गोनां आरो गोथार हाबथा इस्त्रायेल मानसिफोरनि थाखै आरो बिसोरनि फोलेर फोरनि थाखै। गोजाम रदायनि समाव बेयो फसका फरबनि उनाव जागायजेनोमोन नाथाय गोदान रदायनि समाव बे मोननै फरबआ मोमसेल जाबाय। बेफोरखौ बनायनो मानसिफ्रा गासे जौनि फेंफोनाखौ गारनानै खालि सिथावखौल स्निसान जायो।

गाहाम रादाबआ खिन्था जागोन, बे हिनजावआ मावनाय खामनियाबो खिन्था जागोन आरो मानसिफ्रा बिखौ गोसो खांगोन।”

### जुदासआ जिसुनि सुथुरफोरखौ हेफाजाब होनो राजि जानाय।

<sup>10</sup>अब्ला जुदास इसकरियत, जाया सा जिने थोनहरजानाफोरनि सासे बियो गाहाय दौरिफोरनियाव थांनानै जिसुखौ बिसोरनो ग'थायनायनि सोमोन्दै रायज्लाय हैबाय।

<sup>11</sup>बिसोरो बेखौ मिथिनानै जोबोर गोजोननाय मोनदों आरो बिसोरो रां होनो थाखै समाय लादों। अब्ला बियो मोजां खाबुखौ नेनानै थाबाय जिसुखौ बिसोरनो ग'थायनो थाखै।

### फासका फरबनि भ'ज

<sup>12</sup>दायो बियो एमाव गोयै सिथावनि फरबनि सेथि सानमोन, जाय सानाव फासका फरबनि मेन्दाफोरखौ बुथारनाय जायोमोन। जिसुनि सेलाफोरा बिनियाव फैनानै बुंबाय, “जोडो थांनानै फासका फरबनि भजखौ थाम-थिम खालामहैनोसै। नोंडो भ'जखौ बहा खालामनायखौ लुबैयो?”

<sup>13</sup>जिसुआ गावनि सानै सेलाफोरखौ नोगोराव थोनहरबाय। बियो बिसोरखौ बुंबाय, “नोंगोराव थां। नोंसोरो नुगोन सासे मानसि देहुआव दै लांनाय। बियो नोंसोरनियाव फैगोन। बिनि उन उन थां। <sup>14</sup>बियो न'आव थांगोन। न'नि बिगोमानो खिनथागोन।” “फोरोंगुरुआ सोंदों नोडो जोंनो ख'थाखौ दिन्थि जेराव बि आरो बिनि सेलाफोरा फासका फरबनि भ'जखौ जानो हागोन। <sup>15</sup>बिगोमाया नोंसोरनो गोजौनि गेदेर ख'थाखौ दिन्थिगोन जाया नोंसोरनो थाखै थाम-थिम। बैयाव हाय नोंसोर जॉनि थाखै भ'जखौ थाम-थिम खालामदो।”

<sup>16</sup>अब्ला सेलाफोरा नागारनानै नोगोराव थांबाय। गासैबो जिसु बुंनाय बादि जाबाय। अब्ला सेलाफ्रा फासका फरबनि भ'जखौ थाम-थिम खालामबाय।

<sup>17</sup>मोनाबिलियाव जिसुआ गावनि सा जिने थोनहरजानाय फोरखौ लानानै बै न'आव थांबाय। <sup>18</sup>जेब्ला बिसोर गासैबो जानो थाखै आरांगायाव ज'जायो, बियो बुंबाय, “आंखौ फोथाय जेब्ला आं बुंदों नोंसोरनि गेजेराव सासेआ आंखौ आंनि सुथुरफोरनि आखायाव ग'थाय हैगोन दायो आंजों जाफानाय फोरनि सासेया।”

19सेलाफ्रा बेखौ खोनानै जोबोर दुखु मोनबाय। साफ्रोमबो जिसुखौ बुंबाय, “थारैनो आं नडा जानागौ?”

20जिसुआ बुंनाय, “बियो नोंसोरनि सा जिनैनि गेजेराव जाया गावनि सिथावखौ आंनि एसे खुरैयाव सोमफादों। 21मानसिनि बिसाया सैसो गोन जैरे सास्थोराव बुंदों बेबादि बिहा जागोन। नाथाइ जाया मानसिनि बिसा हौवाखौ बुथार होनो ग’थायनानै होगोन बिहा जोबोर गाञ्जि जागोन। बिनि थाखै जोनोम जायिआनो मोजां जागौमोन।”

### फोरबुनि भ’ज

22जेब्ला बिसोरो ज’बाय थादों जिसुआ माखासे सिथावखौ लानानै ईशोरखौ हमबाय होनदों। बियो बेखौ बोफ्लेनानै गावनि सेलाफोरनो होनानै बुंबाय, “बे सिथावखौ लानानै जादो। बियो आंनि मोदोम।”

23अब्ला बियो द्रायखा बिदैनि खुरैखौबो लानानै ईशोरखौ हामबाय होननानै बेखौ बिसोरनो होदों। बिसोर गासैबो खुरैनिफ्राइ लोंबाय। 24अब्ला बियो बुंबाय, “बे द्रायखा बिदैआ आंनि थै, जायखौ ईशोरा गावनि मानसिफोरनि जुनै गोदान रादायखौ जागायजेननो फसरनाय जागोन। 25आं नोंसोरखौ मिथिहोयो, आं बे द्रायखा बिदैखौ लोंफिननाय नंलिया जेब्ला बै साना ईशोरनि रायजोनि आरो गोदान द्रायखा बिदै जागोन।” अब्ला आं बेखौ लोंगोन।”

26बिसोर गासैबो मेथाय रोजाबनानै अलिब हाजोआव थांबाय।

### जिसुआ बुंबाय गावनि सेलाफोरा बेखौ नागारलांगोन

27अब्ला जिसुआ सेलाफोरखौ बुंबाय, “नोंसोर गासैबो नोंसोरनि फोथायनायखौ खोमागोन। सास्थोरा बुंदों,

आं लावखारखौ बुथारगोन।

आरो मेन्दाफोरा खारलांगोन”

जेखारिया 13:7

28नाथाइ आं बुथार जाखांनायनि उनाव आं थैनायनिफ्राइ सिखांफिनगोन। अब्ला आं गालिलआव थांगोन। आं बैयाव नोंसोर फैनायनि सिगां मोनहैगोन।

29पितरा बुंबाय, “गुबुन गासै सेलाफोरा फोथाय नायखौ खोमागोन। नाथाय आंनि फोथायनाया माब्लाबाबो सोमाव जानाय नडा।”

30जिसुआ फिनबाय, सैथोआ जाबाय दिनैनि हराव नोडो आंखौ सिनाया होननानै बुंगोन। नोडो बेबादि खनथाम बुंगोन खननै दावज्ला गिसिरनायनि सिगां।

31नाथाय पितरा गोख्रोंयै आपति खालामबाय, आं माब्लाबाबो बुंडा आं नोंखौ सिनाया होननानै! आं नोंजो थैफा बावगोन सो!आरो गुबुन गासैबो सेलाफ्रा बेबादिनो बुंजोबबाय।

### जिसुआ हारसिडै आरज खालामनाय

32जिसु आरो बिनि सेलाफोरा गेटसिमानि होननाय जायगायव थांबाय। बियो बिसोरखौ बुंबाय, “आं आरज खालामबाय थाब्ला बेयावनो ज’बाय था।” 33नाथाइ बियो बुंबाय, “पितर, जाकुब, आरो जहनखौ गावजों फैफानो बियो जोबोर बायग्लिदों आरो सैसोनाय मोन्दों।” 34आरो बियो बिसोरखौ बुंबाय, “आंनि गोसोआ जोबोर दाहा जादों, आं गावखौनो थैनाय बायदि मोन्दों। बेयाव नेथ’ आरो सिरि मोननानै था।”

35जिसुआ बिसोरनिफ्राइ थांनानै हायाव गुग्रबनानै आरज खालामबाय। बियो बिबाय, जुदि जायबोब्ला, बे सैसोनायखौ बे समाव होनाडा। 36बियो बुंबाय, “आब्बा!<sup>6</sup> आफा! नों गासैखौबो मावनो हाग्रा आंखौ बे खुरि<sup>7</sup> निफ्राइ लोंनो दाहो। नों माखौ गोसो बेखौ नो माव, नाथाइ आंनि गोसो बादि नडा।”

37अब्ला बियो गावनि सेलाफोरनियाव थांफिनदों आरो बिसोरखौ उन्दुना थानाय नुहैदों। बियो पितरखौ बुंदों, “सिमन नों मानो उन्दुदों? मा नोडो आंजों लोगोसे से घनतानि थाखै सिरि मोननानै थानो हाया ने?” 38सिरि मोननानै था आरो आनजादिनि

<sup>6</sup> 14:36 आब्बा रामिक सोदोब जायखौ जुदयारि गथ’फोरा बिफाफोरखौ गाबजिनो बाहायो।

<sup>7</sup> 14:36 खुरि सैसोनायनि सिनायथि जिसुआ बे खुरि निफ्राय लोंनायया गोलोनि साननाखौ फोरमायदोमोनदि बियो गिथावना सैसोनायखौ नाजावगोन जाया थाबैनो फैगासिनो दड।



जेंना गसनो बोलो मोननाय बादि आरज खालाम। नोंसोरनि जिउआ सैथोखौ मावनो नागिरो नाथाइ नोंसोरनि मोदोमा लोरबां।

39आरोबाव जिसुआ थांबाय आरो बेबादिनो आरज खालामबावबाय। 40अब्ला बियो सेलाफोरनि खाथियाव थांफिन बावाबाय आरो बिसोरखौ उन्दुनानै थानाय नुहैबावबाय। बिसोरो सिरि मोननानै थानो हायाख्वैसै। बिसोरो मिथियासै बिनो मा बुंफिन नांगौ।

41जिसुआ खनथाम आरज खालामखांनायनि उनाव, बियो गावनि सेलाफोरनिआव थांफिनबाय। बियो बिसोरखौ बुंबाय, “मा नोसोरो दाबो उन्दुनानै जिरायबाय थार्दो? थोबाय। मानसिनि बिसाज्जलाया फापि मानसिनि आखायाव ग’थाय जागोन समा सफैथारबाय। 42सिखांदो!जों थांनांसिगौ। नै आंखौ बिसोरनि आखायाव ग’थायगोन मानसिआ सफैखाबाय।”

### जिसुआ हमजानाय

43जेब्ला जिसुआ रायज्जलायबाय थार्दोमोन बे समाव जुदास सा-जिनै सेलाफोरनि सासेआ बैयाव फैबाय। “बिजों लोगोसे गोबां मानसिफोरनि हानजा दं फायोमोन। गासैबो थुंग्रि आरो थ’खन लानायमोन। बिसोरो गाहाय दौरि, आयेन फोरोंगुरुफोर, जुदायारि गागिफोरजों थोनहर जादोंमोन।”

44जुदासआ बिसोरनो माबा मोनसे थांखि खालामबाय जिसुखौ बिसोरनो दिन्थिनो थाखै बियो बुंबाय, “जायखौ आं खुदुमगोन बिनो जिसुआ। बिखौ हमदो आरो बिखौ फहेरा होनानै नायनानै थार्दो।” 45अब्ला जुदासआ जिसुनियाव थांनानै बुंबाय, “फोरोंगुरु!आरो बियो बिखौ खुदुमबाय। 46अब्ला मानसिफ्रा जिसुखौ हमबाय आरो खानानै लाबोबाय। 47बिसोरनि गेजेराव जिसुनि खाथियाव गसंनाय सासे सेलाया बिनि थुंग्रिखौ ब’खाबाय। बियो बे थुंग्रिजों गाहाय दौरिनि सासे दाहोनानि खोमाखौ दानख्लाबना होबाय।”

48अब्ला जिसुआ बुंबाय, “नोंसोरो मानो आंखौ हमनो थाखै थुंग्रि आरो थ’खन लानानै फैदों आंखौ आरो दायनिगिरिफोर बादि हमनो? 49सानफ्रोमबो आं नोंसोरजों लोगोसे मन्दिरनि जायगाफोराव फोरोंदोंमोन। नोंसोर आंखौ बेयाव ह’मासै। नाथाइ

सास्थोरनि बुंनाय बादि जाफुंनो बेफोर गासैबो जादों। <sup>50</sup>अब्ला जिसुनि गासै सेलाफोरा बिखौ नागारनानै खारलांबाय।”

<sup>51</sup>जिसुनि उनाव थांनायफोरनि गेजेराव सासे सेंग्रा मानसिया गोबा सि गाननायमोन। जेब्ला मानसिफ्रा बिखौ हमनो नागिरबाय <sup>52</sup>बियो गाननाय जिखौ बिसोरनि आखायाव नागारनानै लंथयै खारलांबाय।

### जिसुआ जुदायारि दैदेनगिरिनि सिगांडाव

<sup>53</sup>जायफोरा जिसुखौ हमना लाबोदोंमोन बिखौ गाहाय दौरिनि न'आव लांबाय। गासै गाहाय दौरिफोर, जुदायारिनि गागिफोर, आरो आयेन फोरोंगुरुफोर बैयावहाय ज'जाबाय। <sup>54</sup>पितरा जिसुनि उन उन थांदो, नाथाइ गोजानै थादों। बियो बिनि उन उन गाहाय दौरिनि न'सिम थांदो। बियो लांगोनायाव थांबाय आरो नेग्राफोरजों ज'फानानै गावखौ बिसोरजों अर साइफानानै गुदुं खालामदों।

<sup>55</sup>गाहाय दौरिफोर आरो गासैनि गोजौसिन आफादआ जिसुनियाव माबाफोर गोरिन्थि दिहुननो नाजादों जायजों बिखौ बुथारनो हागोन। नाथाइ आफादआ जेबो फोरमान मोनाखैसै जायखौ लानानै जिसुखौ बुथार होनो। <sup>56</sup>गोबां मानसिफोरा फैबाय, आरो जिसुनि सोमोन्दै नंखाय बाश्राफोर बुंफैबाय, नाथाइ बिसोर गासैबो गुबुन गुबुनै बुंदों। रावबो बिसोरजों राजि जायासै।

<sup>57</sup>अब्ला माखासेआ गसंबावबाय आरो जिसुनि सोमोन्दै गोबां थागाय बावबाय। बिसोरो बुंबाय, <sup>58</sup>“जोडो बे मानसिखौ बुंनाय खोनादों” आं बे मानसिनि आखायजों बानायनाय मन्दिरखौ सेफायगोन आरो सानथमनि उनाव आं गुबुन मोनसे मन्दिर बानायगोन जाया मानसिनि आखायजों नडा। <sup>59</sup>नाथाइ बिसोर मानसिफोर बुंनाय जोंबो राजि जायाखै सै।

<sup>60</sup>अब्ला गाहाय दौरिया गासैनि गेजेराव सिखारनानै जिसुखौ बुंबाय, “बिसोर मानसिफोरा नोंनि बेरेखा बुंदों। नोंहा माबाफोर बुंनो दड नामा बिसोरनि दाय होनायनि सायाव? बिसोरो सैथोखौ बुंदोना? <sup>61</sup>नाथाइ जिसुआ बिनो फिननाय होनो जेबो बुंडा खैसे।

गाहाय दौरिया जिसुनिआव गुबुन मोनसे सॉलु सॉबावबाय: “नोडो मसिह’आ ना ईशोरनि बोर मोननाय बिसाज्ला?” <sup>62</sup>जिसुआ फिनबाय नंगौ आंडो ईशोरनि बिसाज्ला आरो इयुनआव नॉसोरो नुगोन मानसिनि बिसाज्लाया।गासै बोलो गोरा ईशोरनि आगदा फारसे ज’नाय। आरो नॉसोरो नुगोन मानसिनि बिसाज्लाया सोरगोनि जोमै जों फैनाय।”

<sup>63</sup>जेब्ला गाहाय दौरिया बेफोर बुंनायखौ खोनायो बियो बिनि गाननाय सिखौ रागाजों बिसिनानै होदों, “जोंनो आरोबाव रावनिबो साखि नांबावलिया! <sup>64</sup>नॉसोर गासैबो बे बायदि ईशोरखौ लाजि फोनां नायखौ खोनाबाय। नॉसोर मा सानो?”

साफ्रोमबो राजि जाबाय जिसुआ दायनिगिरि आरो बुथार जानांगौ होननायै। <sup>65</sup>माखासे मानसिफोरा बिखौ खुदै मुजुबाय। बिसोरो बिनि मेगनखौ खोबथेबाय आरो बिसोरो गावनि आखायजों सौबाय। बिसोरो बुंबाय, “नाबि जानानै जोंनो खिन्थादो सोर नोंखौ बुंदों।”अब्ला फहेरा होग्राफोरा जिसुखौ लानानै बुहैबाय।

### पितरा जिसुखौ मिथियो होनानै बुंनो गिनाय

<sup>66</sup>जेब्ला पितारा सिख्लायाव दंबाय थायोमोन गाहाय दौरिनि सासे रुवाथि हिनजावसाया बैयाव फैबाय। <sup>67</sup>बियो बिखौ गावखौ गुदुं खालामनो अर साइबाय थानाय नुबाय। बियो बिनि खाथियाव नायफैनायै बुंबाय नोडो जिसुजों दड मोन, जाय मानसिया नाजरेथनिफ्राइ।

<sup>68</sup>नाथाइ पितरा बुंबाय, “बियो सैथो नडा। बियो जेबो ओथि गोयै, बियो बुंबाय।” आं बुजियासै नॉसोरो माखौ रायज्जलायदों। अब्ला बियो नागारनानै सिख्लानि लांगोनायाव ओंखार लांबाय। अब्लानो दावज्जलाया गिसिरबाय।

<sup>69</sup>जेब्ला रुवाथिआ बिखौ बैयाव नुबावदों, बियो आरोबाव बेयाव गसंना थानाय मानसिफोरनो बुंबाव दों, बे मानसिआ बिसोरनि सासे। <sup>70</sup>आरोबाव पितरा बुंबावदों बियो सैथो नडा।

दसे समनि उनाव बैयाव गसंनाय मानसिफोरा बुंबाय, “जों मिथिगौ नोडो बैसोरनि गेजेरनि सासे मानोना नोंबो गालिलनिफ्राइ।”

<sup>71</sup>अब्ला पितरआ साव होनो हमबाय, बियो बुंबाय, आं ईशोरनियाव समाय लायो जाय मानसिखौ नोंसोरो बुंदों आं बिखौ सिनायथारा।

<sup>72</sup>जेब्ला पितरा बेबादि बुंखांबाय, दावज्लाया नैथिबार गिसिरबाय। अब्ला बियो गोसोखांबाय जिसुआ बिखौ बुंदोंमोनः दावज्लाया खननै गिसिरनायनि सिगां नोडो आंखौ खनथाम फोलागोन आंखौ सिनाया होनना, “पितरा गाबनो हमबाय।”

### सासनगिरि पिलाताआ जिसुखौ सोंथिफोर सोंनाय

**15** <sup>1</sup>बेरे फुंजानि समाव, गाहाय दौरि, जुदायारि गागिफोर, आयेन फोरोंगुरुफोर आरो जुदायारिफोरनि गोजौसिन आफादआ लोगोसे सानज्लायबाय जिसुखौ मा खालाम नांगौ। बिसोरो जिसुखौ खानानै सासनगिरि पिलातनि आखायाव ग'थाय हैबाय।

<sup>2</sup>पिलातआ जिसुखौ सोंबाय, मा नोडो जुदायारि फोरनि राजा?

जिसुआ फिनबाय, “औ बियो सैथो।”

<sup>3</sup>गाहाय दौरिफोरा गोबां बाश्राफोरनि थाखै जिसुखौ दायनिगिरि खालामदों। <sup>4</sup>बिनि खायनो पिलातआ जिसुखौ गुबुन मोनसे सोंथि सोंबावदों। बियो बुंबाय, “नोंडो नुदोंदि बिसोर मानसिफोरा नोंखौ गोबां बाश्राफोरनि थाखै दायनगिरि खालामदों। नोडो मानो फिननाय होयाखै?”

<sup>5</sup>नाथाइ अब्लाबो जिसुआ फिननाय होयाखै। आरो बियो थारैनो पिलातखौ सोमो नांहोबाय।

### पिलातआ नाजादोंमोन नाथाय जिसुखौ हगारनो हायासै

<sup>6</sup>बोसोरफ्रोमबो फासका फरबनि सानाव जोबथेसलियाव जोबजानाय फोरनि सासेखौ सासमगिरि आ हगारो, मानसिफ्रा सोरखौ हास्थायो बिखौनो हगारोमोन। <sup>7</sup>बै समाव बाराबास मुंनि सासे मानसिआ जोबथेसालियाव जोबजादोंमोन। बि आरो सोमावस्रग्रा बिजों लोगोसे जोबथेसालियाव दोनजादोंमोन जाया दावराव दावसि जानायाव मानसिफोरखौ बुथारदोंमोन। <sup>8</sup>मानसिफ्रा पिलातनियाव फैबाय, आरो बिनियाव सोंबाय,

बोसोरफ्रोमबो बियो मावनाय बादि सासे जोबना दोनजानाय मानसिखौ हगारनो।  
 9पिलातआ बिसोरखौ सोंबाय, “नोंसोरो आंखौ जुदायारिफोरनि राजाखौ हागारजानो  
 हास्थायो ना?” 10पिलाता मिथिगौदि गाहाय दौरिफ्रा जिसुखौ बिनि आखायाव मेगन  
 सोनानैसो ग’थायफैदो। 11नाथाइ गाहाय दौरिफ्रा मानसिफोरखौ बुरखायनानै पिलातखौ  
 सोंहोबाय, बाराबाखौसो हगार नांगौ जिसुखौ नडा।

12पिलाता मानसिफोरनियाव सोंबावबाय, अब्ला आं बे मानसिखौ मा खालामनांगौ,  
 जायखौ नोंसोरो जुदायारिफोरनि राजा मूंखदों?

13मानसिफ्रा होखावबाय, बिखौ खुसआव होनानै बुथार!

14पिलातआ सोंबाय, “मानो? बियो मा गोरोन्थि मावदों?”

नाथाय मानसिफ्रा गोबारनिफ्राय गोबोरै हज्जिनानै बुंबाय, “बिखौ खुसआव होनानै  
 बुथार!”

15पिलातआ मानसिफोरखौ गोजोनहोनो हास्थायदोंमोन बिनिखायनो बियो बिसोरनि  
 थाखै बाराबासखौ हगारबाय। आरो बियो सान्थ्रिफोरखौ जिसुखौ साबुक फोरजों  
 बुहोबाय। अब्ला बियो जिसुखौ सान्थ्रिफोरनि आखायाव खुसाव होनानै बुथारनो  
 ग’थायबाय।

16पिलातनि सान्थ्रिफोरा जिसुखौ सासनगिरिनि राजमहलाव लांबाय(बे जाबाय,  
 प्रायेरतरियाम)। बिसोर गुबुन सान्थ्रिफोरखौ बो लोगोसे लिंहरबाय। 17बिसोरो जिसुखौ  
 फानथाव रंनि खसाव गानहोबाय सुनि मुकुत बानायनानै आरो बिनि खर’आव  
 गानहोबाय। 18अब्ला बिसोरो हज्जिखावनो हमबाय, “बरायबाय जुदायारिफोरनि  
 राजा!” 19बिसोरो लावथिजों खर’आव बुबाय थदों आरो बिनियाव मुजुदेरदों।  
 अब्ला बिसोरो हान्थु खरायनानै गंग्लायनानै खुलुमफ्लादों राजा होनानानै सनमान होनो।  
 20बिखौ अपमान होखानायनि उनाव खसाबखौ गानहोफिनबाय। अब्ला बिसोरो बिखौ  
 खुसआव होनानै बुथारनो राजमहलनिफ्राइ लानानै थांबाय।

### जिसुआ खुसआव दोखथाव जानाय

21करिनियानिफ्राइ सिमन मुंनि सासे मानसिआ नोगोरनिफ्राइ फोथाराव थाबाय

लांदोमोन। बियो आलेकजेनदार आरो रुफासनि बिफामोन। सान्त्रिफोरा जिसुनि खुसखौ बिनो ब्रा ब्रा बानहोदोमोन। <sup>22</sup>बिसोर जिसुखौ गलगथा मुंनि जायगायव लांदोमोन। (गलगथानि ओंथिआ खर'बेगेनि जायगा) <sup>23</sup>बैयाव बिसोरो मोदोमनाय बिदैनि ग'लायनाय बिनो होदोमोन। नाथाइ बियो बिखौ लोंडाखैसे। <sup>24</sup>सान्त्रिफोरा जिसुखौ खुसआव दोखथाबदों। अब्ला बिसोरो बिनि गाननाय ख'साबखौ गावसोरनि गेजेराव रानज्जायनो जुवा गेलेबाय सोर बबेखौ मोनगोन।

<sup>25</sup>बियो फुंनि मुगा गु जाबायमोन। जेब्ला बिसोर जिसुखौ खुसाव दोखथाबदों। <sup>26</sup>बैयाव, बेबादि जिसुनि बेरेखा दाय फोनांनाय महर लिरनाय जादों, बियाव लिरदों, “जिसुआ जुदायारिफोरनि राजा।” <sup>27</sup>बिसोरो लोगोसे सानै दाखुफोरखौबो खुसआव दोखथाबदों सासेखौ आगदाथिं आरो गुबुन सासेखौ आगसिथिं। <sup>28</sup>आरो बियो दिन्थियो सास्थोराव बुंनाय गासै ओंथिखौ। बिसोरो बिखौ आयेन बारसिनग्रा फोरजों लोगोसे दोनफादों।

<sup>29</sup>बे लामार्जों थाबाय लांनाय मानसिफ्रा जिसुखौ गात्रि बुंदों। बिसोरो गावसोरनि खर'फोरखौ थिखं थिखं खालामनानै बुंदों, “नोडों बुंदोंमोन सानथामावनो मन्दिरखौ सिफायगोन आरो सानथामावनो लुफिनगोन। <sup>30</sup>बिनिखायनो नोडो गावखौ बासायदो आरो खुसनिफ्राइ ओंखारबोदो।”

<sup>31</sup>गाहाय दौरिफोर आरो आयेन फोरोंगुरुफ्राबो बेयाव दंमोन। बिसोरो जिसुखौ निन्दिनानै गुबुन मानसिफोर बादिनो बुंबाय। बिसोरो गावजों गाव होनज्जायदों, “बियो गुबुनखौ बासायो नाथाइ गावखौ बासायनो हाया।” <sup>32</sup>जुदि बियो थारैनो ख्रिष्ट', ईसायेलनि राजाब्ला, बियो दानो खुसनिफ्राइ ओंखार बोथों। जेब्ला जों बेखौ नुगोन, अब्ला जोडो बिखौ फोथायगोन। जिसुजों खुसआव दोखथाब जानाय दायनिगिरिफ्रोबो बिखौ गात्रि बाश्राफोर बुंदों।

### जिसुनि थैनाय

<sup>33</sup>सानजौफुआव गासै हादोरा खोमसि जाबाय। बे खोमसि जानाया बेलासेनि मुगा थामसिम थादों। <sup>34</sup>बेलासेनि मुगा थामआव जिसुआ गोबारे हज्जिनानै गाबदों। “एलय,

एलय, लेमा साबुकथानि? बिनि ओथिआ आंनि ईशोर, आंनि ईशोर नोडो आंखौ मानो हारसिं नागारखो?”

35बियाव गसंनाय माखासे मानसिफ्रा बिखौ खोनानानै बुंदों, “खोनासं!बियो एलिजाखौ गाबज्जिदों।”

36बिसोरनि सासेआ खारलानानै सोबखांग्रा मुवाजों गोखै द्राखाखौ सोबखांनानै बिखौ नोलोनि गन बिजौआव खानानै जिसुनो बिनिफ्राइ लोंनो हानायबादि दौहरदों। मानसिआ बुंबाय, “दायो जोंडो नेनानै नायनि एलिजाया बिखौ खुसनिफ्राय बोख्लायनानै लांनो फैयो नामा?”

37अब्ला जिसुआ गोबारै हज्जिनानै थैबाय।

38जेब्ला जिसुआ थैयो मन्दिरनि परदा सिआ खानै स्रा जिखावबाय। परदासिआ गाजौ निफ्राइ जिनो हमबाय, आरो गाहायसिम जिखाव लांबाय। 39जौसे दावहा नांग्राफोरनि सान्श्रि गाहाय, जाया खुसनि सिगांथिं गसंदोंमोन बियो जिसुनि थैनायाव मा जादों बिखौ नुनानै सन्श्रि गाहाया बुंबाय, बे मानसिआ थारैनो ईशोरनि बिसाज्ला।

40माखासे हिनजावफ्रा खुसनि गोजानाव गसंनानै नायहरदों बिसोरनि मादाव मागदालानि मरियम, सालमि, आरो जाकुबा आरो जसेसनि बिमा मरियम, (जाकुब बिनि दुइसिन बिसाज्ला) 41बिसोर आयजोफ्रानो जिसुनि उन उन थांफानानै गालिलआव जिसुखौ दाव दाव खालामदोंमोन। गोबां जिसुजों जेरुसालेमनिफ्राइ फैफानाय आयजोफ्राबो बियाव दंमोन।

### जिसुखौ फ'बनाय

42बे साना थाम थिम खालामनाय सान होनानै बुडो (बिनि ओथिआ जाबाय साब्बादनि सानसेनि सिगां) बे खालि खोमसि जानो हमबायमोन 43आरामेथियानि जसेब मुंनि सासे साहसि मानसिआ पिलातनियाव थांनानै जिसुनि मोदोमखौ बिहैबाय। जसेबआ गोजौ आफादनि सासे गोनां सोद्रोमामोन। मानसिफोरनि गेजेराव बियो सासे जाया ईशोरनि रायजो फैनायखौ लामा नायग्रा।

44पितरा जिसुखौ थैबाय होनना खोनानानै जोबोर सोमो नांदों। अब्ला बियो जौसे दावहा नांग्राफोरनि गाहाय सान्त्रिखौ लिनहनानै बियो बिखौ सोंबाय जिसुआ थै मारबाय ना। 45जेब्ला पिलातआ सान्त्रि गाहायनिफ्राइ खोनायो बियो जसेबखौ बुंबाय नोडो मोदोमखौ लांनो हागोन।

46जसेबआ माखासे सन खुन्दुनि सि लाबोबाय बियो खुसनिफ्राइ मोदोमखौ लाबोनानै सन खुन्दुनि सिजों फानफबनानै मोदोमखौ अन्थायनि मांखर सिडाव दोनबाय। अब्ला बियो मांखरखौ गेदेर अन्थायजों मोखांखौ फांथेबाय। 47मागदालानि मरियम आरो जसेसनि बिमा मरियमा जिसुखौ फ'बनाय जायगाखौ नायबाय थार्दों।

### जिसुआ थैनायनिफ्राइ सिखां फिननायनि रादाब

**16** 1साब्बादनि सानसेनि उनाव, मागदालानि मरियम, सालमि, आरो जाकुबनि बिमा मरियमा जिसुनि मोदोमाव फुनहैनो मोदोमनाय मसलाफोर बायदोंमोन। 2बै साननि बेरे फुंजानि समाव सबथानि सेथि सानाव, आयजोफोरा मांखराव थांदोंमोन। बियो बेरे फुंजानि सान ओंखारनायनि उनाव। 3आयजो फोरा गावजों गाव होनज्लायदों, “बैयाव मांखारनि लांगोनाया गेदेर अन्थायजों होथेनाय। सोर जोंनि थाखै बे अनथायखौ बोखारना होगोन?”

4अब्ला हिनजावफोरा नायनानै नुबाय अन्थाया बोखार खानायसो। अन्थाया जोबोर गेदेरमोन, नाथाइ बियो लांगोनिफ्राइ बोखार जाखानायसो 5हिनजावफोरा मांखारसिम थाबाय लांबाय आरो नुबाय गुफुर हि गाननाय सासे सेंग्रा मानसि बियो मांखरनि आगदा फारसे ज'नानै दं। हिनजावफ्रा गिदों।

6नाथाइ मानसिआ बुंबाय, “गिनो नाडा। नोंसोरो नाजरेथनि जिसुखौ नागिरदों, जाया खुसआव बुथार जाबाय। बियो थैनायनिफ्राइ सिंखा फिनबाय। बियो बेयाव गैलिया। नाय, बे जायगायावनो जेब्ला बियो थैदों बेयाव दोनजा दोंमोन। 7दायो थांदो आरो बिनि सेलाफोरनो बुंहैदो। थारैनो पितरनो खिनथाथार। बिसोरनो खिनथा, जिसुआ गालिलआव थांगोन आरो नोंसोर फैनायनि सिंगा बियो बैयाव थांगोन। नोंसोर बिखौ बैयाव नुगोन, जैरे बादि बियो नोंसोरखौ बुंदोंमोन।”



8हिनजावफोरा जोबोर गिदों आरो गोनो गोथो जादों। बिसोरो मांखरखौ नागारानाई खारलांबाय। बिसोरो बुडाखैसै मा जाखो, मानोना बिसोरो गिदोंमोन।

### माखासे सेलाफोरा जिसुखौ नुनाय

9जिसुआ सबथानि सेथि सानखालि फुंडाव सिखांफिनबाय। बियो मागदालानि मरियामजों सिगां नुजाग्रोदों मोनसे समाव जिसुआ मागदालानि मरियमनिफ्राइ स्नि बादुवा जिउखौ होखार दोंमोन। 10मरियम आ जिसुखौ नुखानायनि उनाव बियो थानानै बिनि सेलाफोरनो खिनथा हैदों। बिसोरो जोबोर दुखु मोनदों आरो गाबबाय थादोंमोन। 11नाथाइ मरियमा बिसोरखौ बुंबाय जे जिसुआ गोथां जाबाय। बियो बुंबाय, बियो जिसुखौ नुबाय, नाथाय बिखौ बिसोरो फोथायाखैसै।

12बिनि उनाव जिसुआ सानै सेलाफोरनियाव नुजाबाय जेब्ला बिसोरो नोगोराव थाबाय लांबाय थादोंमोन। नाथाइ जिसुआ बुथार जानायनि सिगांनि बादि नंतियामोन। 13बिसोरो सेलाफोरा थांफिननानै गुबुन सेलाफोरनो खिनथा हैबाय मा जानायमोन। आरोबाव सेलाफोरा बिसोरखौ फोथायखैसै।

### जिसुआ सेलाफोरजों रायज्लानाय

14बिनि उनाव जिसुआ सा-जिसे सेलाफोरजों नुजाहैबाय, जेब्ला बिसोरो ज'बाय थादोंमोन। बियो बिसोरखौ सोंखारिनानै बुंदों मानोना बिसोरहा एसेल, फोथायनाय दंमोन। बिसोरो गोसो गोरा आरो जिसुआ थैनानिफ्राइ थांखौ फिनबाय होननानै मानसिफोर बुंनायखौ फोथाननो नेउसि दोंमोन।

15बियो बिसोरनो बुंबाय, “संसारनि जेरावबो थां। गासैनोबो गाहाम रादबखौ खिनथा है। 16जाया बेखौ फोथानानै बाप्टिस्मा लागोन बियो बासायजागोन, नाथाय जायफोरा फोथाया बिसोरो दायनिगिरि हमनानै बिसार खालामजागोन। 17आरो जाय मानसिफ्रा बिफोरखौ फोथायगोन बिसोरो फोरमान होनो हागोन: बिसोरो आंनि मुंडाव बादुवा जिउफोरखौ मानसिफोरनिफ्राइ होखारनो हागोन। बिसोरो गावसोर सोलोंफैरे रावफोर रायज्लायगोन।” 18जुदि बिसोरो जिबौफोर एबा बिस गोनां मुवाफोरखौ

लोंब्लाबो बिसोरो जेबो जानाय नडा। बिसोरो गावसोरनि आखायफोरखौ जब्रा मानसिफोरनियाव होब्ला बिसोरो मोजां जागोन।

### जिसुआ सोरगोउनाव थांफिननाय

<sup>19</sup>जिसुआ गावनि सेलाफोरनो बेफोरखौ बुंखानायनि उनाव बियो सोरगोआव लांखो जाबाय। <sup>20</sup>सेलाफोरा संसारनि गासैबो जायगायाव थांनानै मानसिफोरनो बे गाहाम रादाबखौ बुंहैबाय, आरो फोरबुआ बिसोरखौ हेफाजाब खालामबाय। बिसोरनो सोमो गोनां हाबा फोर मावनो गोहो होनानै फोरबुआ फोरमान हायोदि बिसोरनि बुंनाय गाहाम बाश्राया सैथो।